

靈芬館詞四種

冊一

靈芬館詞四種

冊二

靈巫芬館詞四種

四部備要

集部

上海中華書局據愉園叢

書本校刊

桐鄉 陸費逵 總勘

杭縣 高時顯 輯校

杭縣 吳汝霖 校

丁輔之 監造

重刻靈芬館詞序

國朝詞人鱗萃羽接近三百載傳數十家諸餘述造亦云夥矣仁和許文邁孫先生少習倚聲夙多藏本寄驩騷雅導原於黃華謝濫激訐選雋於白紵付鈔莢手蠶頭剡紙之書點拍檀牙鴨嘴吳船之曲獨於頻伽詞三種癖好之素若有冥契焉孫晟之師島佛畫像壁閒羅威之嗜江東借名集內然而棗梨煨燼劫灰且寒縑帙畸零名山無副將使清平三調遽絕龜年之傳摩詰五言僅有何戡之誦茲可吁也不其惜歟先生驅螽留仙握蠅詫珩獨緡緡重付琬鐫欲取汁一鬻而餉諸友朋似椹裘千狐而被之來哲諸家並蒼頗遜於花閒萬口能歌庶聞於井上嗟乎論衡入吳中郎讀而始顯玄經在蜀平子測其再興傳書之難自昔同嘅矧夫聲律小道畸窮所爲託迹旣卑知音益尠先生斯舉亦可謂因緣微尙契會古懽振靈響於旣沈噓潛燿於將滅者矣先生鄉者自署靈芬私淑弟子其所爲煮夢

詞力排纖仄獨造清微靡不接軫芳塗同源瑤峽儻編合集如交珊
玉之柯獨抱遺書乃顯葫蘆之本若夫昔之綴緝非出一時今之編
排仍依舊第則薈洲老去旣成癸辛之書夢窗續編始有丙丁之集
曼翁序述未及其全爾預幸睹成書猥承授簡號三中於子野媿無
得意之詞椽百影爲東坡定有善歌之士斯則元晏舊序久論價於
鴻都丁廩小文終負慚於鳧續者也光緒己卯九月旣望錢唐張預

余少喜爲側豔之辭以花閒爲宗然未暇工也中年以往憂患甚懼則益討沿詞家之源流藉以陶寫阨塞寄託清微遂有會于南宋諸家之旨爲之稍多其於此事不可謂不涉其籬籬者已春鳥之啾啁秋蟲之流喝自人世之觀似無足以說耳目者而蟲鳥之懷亦自其胸臆閃出未易輕棄也爰鈔丙辰以前爲蘅夢詞丙辰迄今曰浮眉樓詞各二卷序而存之自此以往息心學道以治幽憂之疾其無作可也嘉慶八年癸亥頻伽居士郭麐敘

余自存蘅夢浮眉二集意不復更作而數年以來學道未深幻情妄想投閒紛然加以友朋牽率多體物補題之作共得如干首不忍棄去過而存之鐵秀之呵固所不免休文之懺竊或庶幾亦自恨結習之難除悔過之不勇也嘉慶丁卯長至日鉛山舟中頻伽居士自序

珍做宋版印

靈芬館主三十七歲小像



像

其目無人其心無我與世周旋謂狂
也可規模背時文亦宜然不趨利祿
之路遂為他人所先至其鉢心搗胃
咀宮舍膏穿穴險因窮極豪達
與時賢而相較似有一日之長

靈芬館主人命其弟鳳作并書

靈芬館詞總目

蘅夢詞

二卷

浮眉樓詞

二卷

懺餘綺語

二卷

爨餘詞

一卷

珍做宋版印

邁孫重鑿靈芬館詞甫竟高君龔甫出所藏爨餘詞一卷相眎蓋道光壬午冬頻伽先生寓樓不戒於火後從友好鈔集而成者邁孫得之如獲拱寶亟爲補苴以成完璧龔甫之有功於靈芬爲不淺矣古人遺文墜業散佚不傳者不知凡幾世有如邁孫龔甫其人者爲之搜輯而存之吾當鑄金事之尤願邁孫力充此意於無窮已也庚辰二月秀水沈景修記

珍做宋版印

蘅夢詞卷一

吳江郭慶祥伯著

仁和許增邁孫刊

風蝶令

礎入尖風響，鐙留短燄紅。一衾幽夢斷孤鴻。正是可憐時候，可憐儂。
鏡約眉痕外，琴聲鬢影中。王昌不合住牆東。贏得傷春傷別，恨重重。

一翦梅

莫愁生小鬱金堂，鬢點飛黃。機織流黃，曼聲一曲轉清商。塵繞歌梁，
花顫釵梁。洞房對靄頓書倉。一丈紅薔，只隔紅牆。題成錦字少人，
將月自迴廊，人自迴腸。

菩薩蠻

垂簾柙放雙金蒜，卷簾腕露雙金釧。細雨溼芭蕉，綠窗人寂寥。好

從簾外走湘影橫波溜珠子護雙鴉兩鬟抹麗花

又

花幡不禁封姨惱碧紗窗裏春寒峭雛燕落風前嗔人不卷簾 躡
青南陌路又把佳期誤寒食杏花天魂銷似去年

賣花聲

深院鎖葳蕤青鳥飛遲閒將寸紙寫相思小研墨香銅雀瓦自畫烏
絲 窗扇耀琉璃月影迷離也會刻燭倚新詞到得海棠新月上便
憶當時

天仙子

小亭開宴梨花白釵痕衫影湘屏隔衆中欲避暗中來仍小立眼波
瞥有人見了紅雙頰

一痕沙

落了梨花香雪過了荒村寒食負了去年期可憐伊 三月已將三

十記得去年今日今日是何時沒人知

菩薩蠻

寒夜

熏鑪灘鶻寒無力清冰一片紅蕤溼抱影就鐙眠雁聲寒一天 霜
華催曉角殘夢如煙薄莫道夢無憑夢兒還不成

如夢令

漏水沉沉欲凍煙鑲玉樓雙鳳喚起小窗前窗外花枝搖動休送休
送今夜月寒霜重

疏簾澹月

寒月

澄澄寒水漸浸入玉階冷清清地一個愁人獨自披衣夜起小窗瘦
影初斜矣怕難禁清寒如此梅花閣下蘆花簾外那人睡未 此際
遣懷無計況殘碁隣篴一時俱至獨立閑庭惹起幾番心事孤鴻弔

影霜天裏驀回頭月明千里今宵酒醒一聲霜角清愁而已

釵頭鳳

簷鐵

屏山曲春眠足丁冬驚起鴛鴦宿重簾靜重闌凭月明如水梨花無影認認認珍珠箔秋千索琤琤攪碎簷前玉呼人問春來信鸚哥報道東風猶緊聽聽聽

荷葉杯

兩扇綠窗開了含笑獨憑闌羅衫花影兩相照知道月華寒

好事近

深院斷無人拆徧秋千紅索一桁畫簾開處在曉涼池閣潛行行過曲闌干往事正思著猶認墮釵聲響卻梧桐葉落

天仙子

難得一春常是雨東皇也解留人住芻尼何苦報新晴簾卷處橫波

語回身且過秋千去

憶少年

寄徐江庵

黃花開了兔花寒峭霜華滿地酒徒已星散況酒邊羅髻
燕去鴻歸人病矣也無人會此時意蘆花徧煙水作雪花飛起

一痕沙

夢

雖是無憑無據還勝不情不緒萬一得相尋且兜衾
尋到年時庭院又被何人驚斷鼠觸小屏風也欺儂

卜算子

簾外雨如煙柳外花如雪已是慊慊薄病天又作去清明節
昔日結如心今日心如結心裏重重疊疊愁愁裏山重疊

鷓鴣天

蚪箭丁丁有所思纔眠重起故遲遲
燈花如夢人先嬾霜片無聲衣
自知寒料峭病支離闌簾明月一
絲絲小鬟不敢前頭說又到闌
干立盡時

洞仙歌

贈女冠四九

綠瓊軒上識雲英仙眷六六屏風障
二面正黃花開處青豆房深重
九會算了又還重算妝臺試偷覷
寒玉簪煙十八雙鬟直千萬真
個肯移家畫舸五湖占七十二峯
一半柰三度巫山夢都迷央充使
魚鱗寄書蓬苑段成式詩三十
六鱗充使時

南樓令

憶箭

銀漢一邊流珊瑚四寸鉤
小紅簾卷起清幽貪鞞嬌鬟
風露下忘溜了玉搔頭
纖手弄輕柔新聲曲譜修
笑檀郎欲顧無由腸斷纖纖

今夜月照兩地兩人愁

珍珠簾

憶竹簾

愛他橫影參差滿無人處月地雲堦輕轉非雨復非煙心字香一翦
挂起瀟湘天接水隔眇眇橫波不斷人懶任歸來雙燕也還不平管
絕憶晚涼池閣那人剛梳洗黛眉猶淺自起軸駝鉤露一雙金釧
還似曲闌干畔見夢多少雨絲風片人遠想夜來皓月也還不平卷

鳳凰臺上憶吹簫

香獸銷煙雲魚卷彩空庭簾影深深正高窗不掩驚起棲禽窗外露
華如雨休小立滴透羅襟最好是新涼今夜教疊香衾 惜惜者遭
瘦也多病最文園負了琴心記碧梧桐院紅蕩花陰冰骨玉肌無汗
天如水人墮瑤簪年時事沉吟至今今又沉吟

醉太平

風淒露清參斜斗橫兔華如水回縈到簾紋自平
三更四更無情
有情枕函殘夢初醒有金釵墮聲

清平樂

水文廣簟傍墮雙釵燕花映枕函紅兩靨羞被小鬟看見
何人驚起蘅蕪起來手弄荷珠得伴片時香夢翻教人羨青奴

醉太平

竹風韻長荷風氣香待他月上迴廊再圍碁不妨
竹風一窗荷風半牀憑肩笑問檀郎是今涼昨涼

一落索

荷葉

三十六陂煙霧迷藏無數采蓮人到不驚他是睡著鴛鴦處
等得紅衣脫去無風自舞西窗窗外有芭蕉似商略今宵雨

如夢令

行過重重樓柱隨意低低窗戶一樹碧梧桐垂在小簾深處小簾深處簾外數聲殘雨

清平樂

流鶯聲巧春事江南早心上愁如池上草不覺不知生了江南芳草先生江南行客先行歲歲年年遊子風風雨雨清明

好事近

一月不曾晴早晚鶉鴉啼急剛是絲衣換了卻輕寒惻惻年年羈旅送生涯遮莫又寒食試向雨聲多處問杏花消息

蝶戀花

垂絲海棠

山桃落盡酴醿早積雨初晴紅入紗窗曉睡起美人潮暈小笑渠一樣鬢欹倒病酒心情寒料峭醒眼看人醉眼看花好不茗芋花定笑試然絳蠟花間照

念奴嬌

晝長人悄正深深一桁棗花齊揭甲煎沈香手自熨心字欲燒先結
十里春風一聲杜宇三月楊枝雪酒邊人遠酒邊事向誰說誰念
作客天涯寒氈茸帽又落花時節金盡牀頭酒價少卻恨莫寒猶力
燕子飛來斜陽何限江上山重疊蠟花情重夜來遞淚如昔

風蝶令

疏雨重簾卷生香斗帳熏夜涼長簟易相親只有水精曾枕墮釵人
籠鳥多羈思驚猿易感羣當年聽雨未銷魂贏得而今各自夜深
聞

浣溪沙

兩葉眉兒晚黛低兩頭月子畫樓西兩重心字小蘋衣永夜雙星
人獨立半年小別夢單棲斷無人處學含啼

點絳脣

用夢窗韻

雀舫青簾放船最好葑門路蕩花香處涼露多如雨
既是吳儂只合吳城住君休誤玉環人去錦瑟華年暮

鳳凰臺上憶吹簫

題姚棲霞女史翦愁吟同朱鐵門作

銀燭筵前鐵簫庵裏酒闌客正繁憂出一編相示絲格銀鈎真是閒
愁萬斛問恁地翦得卿愁分明是芳心灰盡紅淚還流 仙遊一聲
鶴唳恐玉宇高寒露冷風秋悵不逢簫史空怨秦樓便是殘香賸粉
人間世不合長留宵深也吹寒角聲又滿城頭樓霞游仙詩却笑樓頭秦弄玉肯攜簫史
共乘鸞臨終詩冷夢未成
鐘自滅疏鐘畫角一聲聲

菩薩蠻

花朝飲袁湘湄秋水池堂

薄寒細雨城南陌去年今日花朝節楊柳一絲絲河橋人去時 去

年春在否今日花朝酒楊柳又依依河橋未別離

惜分釵

芙蓉袂青驄馬明蟬秀鬢人如畫傍香奩頓書籤樓上新眉樓外新
蟾纖纖綵鸞跨蘭香嫁重來人到重樓下淚痕添粉痕漸滿院楊
花一桁疏簾慊慊

憶蘿月

雨斜風細沈坐春寒裏一樹小梅花謝矣又是落鐙天氣 閉中獨
自支頤暗中苦自尋思驀地有人看見低頭兜上鞋兒

酷相思

乍是新正春未透早門外絲絲柳柰脈脈深情渾未逗人見也回頭
走儂見也回頭走 有分逡巡雙勸酒小語更闌後問別後蘭橈何
日又人去也書來否書到也人來否

菩薩蠻

自題小影

銀河隔得紅牆住生綃留得紅顏駐仰首問常娥年年秋柰何
闌干十二曲弱水三千綠獨自莫思量思量人斷腸

蝶戀花

花宮小院得斷縑於壁月鬢風鬢髮未損上書愛月夜
眠遲某月日清環寫字跡妍媚可念爰作詞以紀之

青豆房中花似露圖畫春風零落蝸涎蛙不是深閨留絹素調鉛肯
把芳名注相逢亦有前緣否花不知名也合殷勤護鵲尾金鑪香
一炷夜深蘅夢樓深處

沁園春

唾

金屋阿嬌霧沫九天明珠颺風記越梅如豆華池先嚙石華成紺廣
袖偏工慢臉輕偎香痕偶著欲拭還愁惱個儂幽懽遂又何須銀液

始鎮心忪 私書寫就恁恁愛猶帶脂香著意封正瓊簫吹徹印留
一縷玉梧餘潤飲過三鍾巧溼文窗戲塗粉蝶易褪櫻桃小注紅重
簾下惹檀郎驚認笑是殘絨

金縷曲

鴛鴦湖秋感

曉起西風冷挂輕帆孩兒橋下謝孃門徑落日鴛鴦湖上過衰柳條
條牽恨問何不當初折盡岸草汀蒲都不見但蘆花蕭瑟風淒緊橫
一葉釣魚艇 春人只把春愁省誰管他荒荒落照疎疎雁影去是
春初來秋九兩袖啼痕重印只湖水清流如鏡鏡裏粧樓金翠換況
樓中桂葉明蟬鬢除漚鷺没人問

清平樂

小桃如綺命短東風裏薄薄輕寒人半臂且把簾兒垂地 春人如
許年華春闈幾幅窗紗又是一番寒食不知多少飛花

賣花聲

十二玉闌干六曲屏山留春不住送春還昨夜梨花今夜雨多分闌
珊 春夢太無端到好先殘被衣初換又添絲只是別來珍重意不
爲春寒

壽樓春

看簾紋波橫又日華花影移上簾旌正是連宵絲雨曉來新晴誰喚
我柔魂驚是隔窗春風流鶯奈繡被香溫羅幃寒峭推道殢春醒
當時在芙蓉城有芳年小小低語卿卿無奈朝雲如夢落花無聲容
易別難爲情只淚痕依然分明問碧海青天銀河有誰吹玉笙

高陽臺

過流虹橋感葉元禮事

兩岸緋桃一灣淥水斷橋猶說流虹舊事無端牽人舊恨重重多情
只合相思死更何須眉語會通太匆匆春盡飛花淚盡啼紅 高樓

當日知何處想房權宛轉窗戶玲瓏天遠瑤姬彩雲去也無蹤人間
我亦傷心史似流鸞只哭春風小橋東新月天邊依舊如弓

卜算子

題王朗亭半舫齋

蠶殼短窗兒斑竹疏簾子絕似春江桃葉舟細雨溟濛裏
安把木蘭橈便好浮家去少個低低小舵樓少個人雙髻

柳梢青

被冷香溫自攜銀燭掩上重門隔院啼雅上簾斜月又是黃昏
羅襟別淚猶存有一半香痕酒痕心字叢殘酒人零落直得銷魂

祝英臺近

和龍劍庵韻

小屏山雙畫燭寂寞舊時事過盡春光尺素未曾寄試看樓外垂楊
飛花飛絮憔悴甚樹猶如此輕相棄惟有六扇樓窗會同那人倚

煙鎖重樓人更可知矣料應一點寒鐙一鉤斜月今夜裏照伊無睡

玉樓春

重重簾幙誰家院東去伯勞西去燕卻教相別一相逢只許相思不相見
青絲絡馬香羅薦別後音書和夢斷黃昏怪互不勝寒零落
梨花如雪片

金縷曲

題史赤霞翡翠巢詞卽用集中論宋詞韻

戲馬臺邊柳送征人滿城風雨歸來重九除卻新詞無長物贏得千
金膏帶問辛柳一錢直不尙有梅谿真同調也十年空費屠龍手長
只是征鞍驟 閑滋九畹拳三秀度新腔偷聲入破嚴分細剖天與
豔情無豔福那得笛牀歌袖但伴我秋鐙如豆先向朋箋書左券到
相逢一笑休開口歌一闋一椀酒

清平樂

秦淮感舊

露臺水榭天與初涼夜霧鬢風鬟人去也面面疎簾都下
去來苦恨匆匆相思那得相逢變盡舊時楊柳秦淮一夜秋風

如夢令

衣上微霜淅淅門外輕寒側側和淚出門時又是月高時節小立小
立聽得一聲將息

蝶戀花

鹿城半重園有女郎以簪畫壁作一絕云月匣纖纖扶婢
來梨花如雪點蒼苔紅蠶辛苦愁絲盡誰把同功蠶杼開
後書一毗字意欲題名而未及者作詞其後亦無使其無
傳焉

青粉牆頭苔沒砌誰拔金釵畫破春痕細羅韞纖纖來月底有心人
識相思字天遠彩雲飛去矣卿自何來有個芳名未料得欲題還

又止當時直恁慊慊地

喝火令

題許校書清露瑤臺圖

鶴背吹笙下橋頭步履通雲鬢霧鬢太玲瓏只恐五銖衣薄曉起不
禁風好夢渾難覓重遊未易逢鬱金堂北畫樓東記得樓頭一樹
碧梧桐記得碧梧桐外兩度月如弓

鵲橋仙

杏花風裏梧桐鄉外七尺燕梢齊播玉人春病幾多時直似此鬢偏
髻妥員冰輕響寶釵暗墮知是曉來梳裏有緣也算比肩人只隔
箇船兒同坐

清平樂

河橋楊柳待我開颿久三疊歌聲將進酒忘了明朝分手書窗六
幅輕紗東風一樹梨花只有去年春到去年人到天涯

鎖窗寒

用片玉詞韻

蛛網黏花蝸涎篆榻那人窗戶輕紗六幅閉了一春風雨記當時欲
行未行夜闌昵昵聞私語又誰知此度殘衫茸帽重來羈旅 薄莫
繫船處正楊柳腰身女兒十五三眠三起送盡燕傳鸞侶問別來如
許長條飄零似我還記不傍東偏一樹梨雲見舊時尊俎

清平樂

秦淮後感舊

燕兒傳語人在西湖住蘇小墳前芳草路日日輕寒輕雨 秦淮望
斷香車誰知又到天涯總是東風無定如何只怨飛花

夢芙蓉

題延嘯厓姬人小照

秋江江上樹向芳塘移種最深深處並蒂連枝雙影照秋水石家渾

漫與仙城元有人主六曲闌干是屨廊香徑非是浣紗路 誰滴湘
江清露殺粉調鉛寫出名花譜紅橋流水初過夜來雨畫屏深幾許
想應簾幙無數珍重輕綃有小脣秀靨當面看題句

清平樂

紅袖添香夜讀書圖

丁丁蓮漏篆縷銷香獸心字漸微蟲蠟瘦催得冬郎詩就 人閒良
夜迢迢勸郎書卷須拋只有一枝紅燭休教負了春宵

暗香

水仙花

娟娟楚楚正春人小極芳心初吐斐几紙窗不受人間好風露除是
梅兄礬弟還配得沁人漢女又那得如此清寒明媚又如許 庭宇
最深處有十二畫屏曲曲低護舊時記取到此花開送人去花信今
年太晚風又雨輕寒重作過了落鐙節候有人怨不

蘅夢詞卷一

蘅夢詞卷二

吳江郭麐祥伯著

仁和許增邁孫刊

清平樂

題金陵女子柳花詞卷

紅絲小研小試齊紈扇第一休嫌才地輒人與柳枝同倦
謝家最擅才華如何只詠楊花怪底兒家夫婿年年漂泊天涯

浣溪沙

馬湘蘭蘭竹便面

澹墨傾欹落扇頭紅蘭葉葉竹條條紅粧季布儘風流
今日誰憐王伯毅後來尙有顧眉樓爲伊惆悵寫銀鈎

南樓令

盧竹圃小影

秋鬢也蕭蕭秋庭夜寂寥異鄉秋景最無憀誰畫可憐人獨自又畫
出可憐宵 何處作生朝揚州紅板橋有當年公子風標惜少吹簫
人並坐判我見又魂銷

蝶戀花

高竹筠小影

黃昏不下葳蕤鎖簾幙中間沈水微微火銀鳥傍人人傍我迢迢良
夜銷磨過 聽我狂言君計左有個人兒切莫攤書坐明月漸西花
漸妥鐙殘香炷如何可

菩薩蠻

窗外秋蟲飛不去窗前秋色留將住庭院是誰家滿庭洗手花 露
光團作雨總是秋深處可惜玉簪開没人斜戴來

滿江紅

晚泊秦郵默禱露筋祠下倘乞順風當以平韻滿江紅爲

壽如白石生故事遲明解纜旗脚已轉敬酬一闋

十度秦郵曾未展叢祠瓣香剛又是水楊柳下輕船繫將盡日靈風
人不見開門白水本無郎是誰家燈火送迎神歌九章 東方動驚
曙光篙師起理檝忙見相風烏轉將飛未翔去得順風來順水聰明
元是舊心腸想泠然一路響珊珊明月璫

清平樂

春陰如霧又著重簾護夢到當時郎別處隱隱數聲柔艣 起來滿
院斜陽倚闌一倍悵悵走撲一雙蝴蝶知他直甚心腸

點絳脣

月函女史爲作草蟲扇頭

殺粉調鉛病中寫出秋來意一絲風裏紅蓼花扶起 草草花花添
個蟲蟲媚天如水露華珠綴又溼當風袂

滿江紅

呈座客用湘湄風雨對牀圖韻

雪白鐙紅當酒半忽跳而起不痛飲有如此酒有如此水留客酒難
頻夜滿分湖水送離人幾算人生不合作同心同鄉里 浮蠟綠釭
花喜朋與舊兄和弟便沈沈春酌不能已已病起尙存兒女態醉來
稍有英雄氣得故人滿眼酒盈尊吾狂矣

菩薩蠻

輕陰漠漠昏如霧入春便有廉纖雨遮莫試鐙前雪花飛一天 疎
梅三四點莫是春猶淺走近小闌干問他寒不寒

買陂塘

題黃小松秋影庵圖用江玉屏韻

問詞人馬塍遺跡可餘花木深秀小紅嫁後青春老賸有蕭疎秋柳
宮一晦讓黃九風流開拓蜂房牖歸田若後怕老去悲秋重來照影
水面似人皺 武林路約賃梁鴻杵白野航三兩能受他時定遂移

家願莫遣白雲封守都似舊只鴨脚黃邊添縛香茅否來居客右當
集古編成秋聲賦就斗酒也須有

卜算子

寒食出遊

一隻小瓜皮兩岸垂楊樹指點停船宛轉橋曲曲彎彎處 定不留
春住那不愁春去過了今年三月三又幾點清明雨

醜奴兒令

五三六點微微雨開了梨花謝了梅花纔拓濛濛一面紗 玉堦獨
立思閒事花在鄰家吹落儂家今日東風較大些

月華清

詠丁香花

碎翦鮫綃輕含雞舌繇英枝綴如霰百結芳心慣向春風凌亂算江
南花信更番誰似此香生色淺幽怨共芭蕉卷處一齊斜颭 可惜

雨香雲澹少月影半窗照伊清婉丁字簾前有個丁孃淒斷想春衫
繡上重重怕寬了舊時腰褰簾卷又惺忪碎影小庭篩滿

行香子

薄遊袁江同人爲設伊蒲供於青龍菴菴主爲其女孫名
霞者乞字於余呼令出見曇花一見妙香四聞迦陵其音
舍利始弗未足方斯相好也爰舉明如爲贈并貽以詞

青豆房邊紅豆庭前仙人子生小嬋娟問伊名字合在瑤天是花非
花霧非霧亦非煙 綺樣芳年佩結飛仙佛頭青雲葉披肩似聞我
佛爲說因緣要十年心雙鴉髻五湖船

菩薩蠻

水田百衲雲如葉薄羅翦出重重疊生小不知愁眼波先自秋 雨
過雲不定小語防人聽燒了夜香麼昨宵涼露多

醉太平

憚月仙夫人桃花扇面

深紅一林淺紅一簪枝枝淺淺深深是春風小心
寒漿細斟清溪
獨吟憑他如墨春陰有前時路尋

十二時

湘湄爲周校書畫桐屋夜寒扇面同賦一詞

秋宵鐙火秋衾魂夢秋孃庭院旁人那知得說秋風團扇
流水小
橋清且淺比銀河算來還遠思量一年事只張星曾見
謂張校書繡

又

同湘湄夜坐

疎窗四面秋霖一陣愁人兩個天涯已腸斷况離情無那
桐葉初
肥蕉葉大說淒涼也無人和今宵尙相對怕來宵鐙火

菩薩蠻

湘湄索詞繡帕爲賦

鵝黃淺色揉蘭膩唾尖絨舌愁滋味破體作游絲墨花如折枝 當年春雨句和淚歸何處但解說歸來杏花春自開 當

水龍吟

詠霞用張蛻巖賦倩雲詞韻

生來不學行雲依稀似散依然聚分明瞥見赤城初起又還飛去野
鷺孤時澄江靜處天寒日暮望高城不見丹樓漸隱又何況彩鸞駐
說與仙人子道要留他罡風相護不知天上者般顏色曾經幾度
秀便思餐散還成綺非花非霧怕朝來一縷出門難覓作廉纖雨

齊天樂

荻莊秋荷

翠匳一境平如拭數枝點綴秋意衣褪輕紅佩翻重碧又是一番梳
洗涼蟾初起怕炤見盈盈玉壺清淚風急雲輕露華漸重瀉鉛水
鬧紅舊事誰省有斜陽一舸雲葉雙髻螢火光寒蜻蜓翼斷催老鴛

鴛身世煙波無際且凍釀頻傾曲闌峭倚寄語閒鷗柰厭厭宿醉

河傳

春早將曉夢魂驚落月殷勤早鶯綠窗曙光愁欲明輕輕枕函釵一聲一段綠雲扶未起香不已轉側隨郎臂莫投懷且兜鞦慵來斷紅紅上顚

南樓令

題春人縮髻圖

春夢暈潮霞春風褪臂紗緩春愁盤好雙雅溜了金釵佯不省問開否碧桃花鏡檻者般斜新妝略似他只脩眉人在天涯尙著薄羅衫一件簾又卷太寒些

菩薩蠻

一燈紅貼氍毹地諸郎蠟鳳中堂戲獨自下堦來玉梅開未開誰移紅燭照聽見人雙笑直得小迴身影兒如一人

又

新桐院落惜惜地斷無人到陰天氣手切綠沈瓜一重方空紗藕
花開一半紅影搖人面只解遶闌行隔簾聞笑聲

惜分釵

有見

雙枝槩分流響一江春水如天上最風流最嬌柔貪看鴛鴦忘了回
頭羞羞花惆悵人模樣个儂未必全無恙說前游莫閑愁山外青
山樓外高樓休休

菩薩蠻

金蟾齧鎖金梯滑一重門外銀河闊猶恐未魂銷夜深聞剪刀朝
來粧未就見了佯回首回首莫嫣然鏡中雙靨圓

又

夜深一口紅霞膩唾尖甜舌殘絨細不肯繡鴛鴦枝枝秋海棠吳

絲裝袖復卻繡鴛鴦宿荷葉小於錢要郎知可憐

又

清霜微白黃花瓦全家上冢逢秋社特地教人知紗窗鐙上時蘭
姨智瓊姊略識人間事送與蹙羅裳一雙金鳳凰

又

五湖船小才如葉團團並坐翻欹側愁水又愁風袖邊香唾紅如
何還倚醉壓著儂裙睡當面且由他阿孃顏色和

又

嫩晴天氣春陽動鶯喉微澀歌珠痛蹙損小眉痕羹湯未入脣刀
圭分一裹莫點吳鹽可只說是梅花賺伊肯嚙他

又

獨兒撼得人人起枕函一片朝雲墜慢臉笑投懷夜來難出來迷
藏何處捉人語闌干角莫道沒人知被痕紅半池

又

杜蘭四歲來人世飛瓊不肯留名字略說與排行雪花蒼蘆香 近
來海水淺尙有樓三面煙雨莫登樓樓頭無限愁

生查子

金雁畫橋南碧玉人家小種得碧桃花昨夜先開了 不恨不知愁
只恨無人曉念得阿郎詩句句能顛倒

南鄉子

折枝蕙草

庭院轉光風不省簾前開幾叢只向謝娘頭上見一翦攏鬢玉釵顏
色淺

梅花引

虎山尋夢圖爲陳竹士作

岫如螺水如羅曾共驚鴻照影過步凌波步凌波只問梅花別來相

見麼 此中或有魂來去茫茫不辨梨雲路落花多落花多一路荒
山月明寒柰何

洞仙歌

有紀

華燈弄影照華堂如水羅襪雙鈎見纖麗傍中門低處半曳霓裳聽
佩響又轉曲屏風底 星橋元不隔一寸銀河眼底千金露深意便
算比肩人香逼春衣渾未省衆中迴避也忒倚嬌憨阿娘憐想全不
周防个儂年紀

菩薩蠻

雲堦月地春寒淺迴廊曲徑穿行徧微雨乍晴時小桃三兩枝 東
風吹不定小颺雲鬟影掩斂越羅裳禁他特地香

又

嬉春女伴嫌春早乍晴時候游人少喜未坼輕絲晚風一陣寒 玉

梅花下立點得春衣白小妹笑人癡滿身蝴蝶兒

清平樂

小山窠石徑窄衣香接穿過長廊無氣力坐定雲鬟微側
重來不走長廊花間難捉迷藏驀地一雙蝴蝶等閒飛上羅裳

河傳

香徑人影驀來前桃葉桃根並肩秋波欲流低髻偏仙仙一雙人可
憐
率地鵝黃羣色淺尋不見小立花枝顫晚來風忒匆匆行蹤落
花埋一重

百字令

幢幢燈影是曾經照過幾番元夜火樹銀花剛一瞥已是暗風飄
燭
剪紙心情鬧蛾身世過了今生也人間天上柳梢蘭月初挂
難忘
中酒時光燒燈院落有个人如畫衣上峭寒簾外雪小坐早梅花下
碧海星沈紅心草宿說甚淒涼話春衫依舊淚痕重疊盈把

點絳脣

酒綠燈紅座中有个飛瓊許弦將手語幾陣梨花雨
長定相逢還解相思否臨當去橫波一注也直三年住

齊天樂

金銀花

亂紅都逐流波卷庭院翠陰成幄麕眼籬方鷺絲藤細低冑曉涼池
閣薔薇花落做夏首心情春餘題目裊裊柔條又牽香夢到簾角
朝來風露猶重有人初睡起羅袖寒薄葉底心知花頭眼見小摘冷
香疎萼熱嫌魚玉又滿把蒸成露珠如粟配點雲龍竹鑪湯正熟

賣花聲

題畫扇

小鳳貼釵梁皓腕先攘是誰驚起曉來粧問取木芙蓉上露何日成
霜舊夢莫思量滿鏡眉長水精簾下有微涼喚作春人渾不似莫

是秋娘

乳燕飛

和湘湄作寄伯生

誰賦銷魂句向天涯吹花嚼蕊儂風慙雨我是江南賀梅子莫問閒
愁幾許空記得別離情緒人自漂零天不管但昏昏薄霧悒悒絮肯
爲我寄愁去 征車同出春明路有當時風懷酒膽未諳別苦細馬
馱來人二八醉裏憑肩佢語笑判取千金贖汝一別故人難見面況
鶯鶯燕燕知何處只此意向誰訴

洞仙歌

爲吳珊珊夫人題扇

繡襦甲帳有當年珍偶跨虎重來事依舊向櫻桃湖上寫韻軒開平
視慣也爲洛神佢首 人間與天上何限佳人脩竹蕭蕭倚寒袖福
慧此應無螢火詩成定小試畫羅纖手問何不當初畫乘鸞想霧鬢

風鬟見時還又夫人詠螢云月黑移來星一點風高扶上閣三層

高陽臺

鈴索判花遊絲罥絮送春淚滿輕綃不見春歸流波一夜迢迢明珠
十斛何人手向章臺折取柔條可憐宵蠟照紅曉明鏡紅潮傳來
語最魂銷自說天桃命短怕落花朝重轉春鸞知他何處樓高三生
杜牧關何事爲曾經掌拓纖腰好無聊四月時光雨又瀟瀟

賣花聲

秋水淡盈盈秋雨初晴月華洗出太分明照見舊時人立處曲曲圍
屏風露浩無聲衣薄涼生與誰人說此時情簾幙幾重窗幾扇說
也零星

菩薩蠻

北固題壁

青天欲放江流去青山欲截江流住儂也替江愁山山不斷頭片

帆如鳥落江住儂船泊畢竟笑山孤能留儂住無

唐多令

題畫仕女

深院玉梅天春風錦瑟年似驚鴻留影翩然手擘薛濤牋一幅怕遺
墨澹如煙一枕小遊仙三生小比肩有揚州舊夢誰圓問是夢中
會見麼笑已是十年前

疎影

題素娟錄事畫扇

春愁滿紙看微雲澹月夜寒如水記得前宵葉葉輕衫同在曲闌干
互素娥要鬥嬋娟影笑一樹海棠濃睡得知他畫作乘鸞直恁冷清
清地料想閉宵弄筆怕紛紅駭綠無此幽致朱鳥窗前殺粉調鉛
自滴方諸清淚懷中一墮三生夢又碧海青天無際能禁他幾徧團
圓老卻畫中人矣

漁父詞

有紀

四角紅羅窄地垂銀鈎不動篆煙微燈澹澹月絲絲笑問郎來是幾時

好事近

題何夢華西湖買春卷

何處好尋春春在段家橋側試看門前流水有桃花顏色 鏡中照出四圍山眉黛一時碧笑指槳牙相趁盡鴛鴦灘鷓

百字令

書戴竹友綠花詞後

雁飛汾水只人間李嶠是真才子解作江南腸斷句一卷烏絲闌紙野艸花開池蓮粉墜宛轉能含思

集中野花白蓮二詞尤工

從君貰酒旗亭應有

人記 最難俊侶如雲風懷如月更華年如綺同學少年皆匿笑春

水干卿何事鬲指聲微么弦調苦作者今無幾他時按曲花間更喚

延己

謂馮生
如玉如

女冠子

贈雙脩庵女尼韻香一號清微

清宵更永微月度雲無影蹋蒼苔試問三生事誰脩雙笑來
房深
香似霧人澹韻如梅記取闌干外玉簪開

蘅夢詞卷二

浮眉樓詞卷一

吳江郭慶祥伯箸

仁和許增邁孫刊

天香

花露

炊玉成煙揉春作水落紅滿地如埽百末香濃二霄夜冷無數花魂
招到仙人掌上迸鉛水銅槃多少空惹蠶王惆悵未輸蜜脾風調
謝娘理粧趁曉面初勻粉光融了試手擘牋重盥薔薇尤好卻笑文
園病渴似飲露秋蟬便能飽待鬪新茶聽湯未老

附前調

尤維熊二娛

候火安爐量沙布甌蒸成芳液盈匕涼沁荷簫冷淘槐葉輸與山
僧佳製餅鬻分餉傾一滴便消殘醉卻笑辛勤蠶釀祇供蜜殊留
嗜試調井華新水面纔勻埽眉還未慣共粉奩脂盞上伊纖指

向晚粧臺一餉又融入犀梳攏雙髻夢醒餘香綠鬟猶膩

齊天樂

塔鈴

四禪天上天風小偶然吹墮仙響窅堵波高金銀鐺動雨歇寶繩微
漾雲思霞想在謾謾松閒星星鐘上驚起栖禽飛來還向相輪傍
三更歌管都罷只郎當九子似話惆悵步履廊空吹簫客去自發人
天高唱舊遊無恙認放鴿庭陰護花窗網小立斜陽隔牆聞梵放

前調

尤維熊

人天籟寂煙霄暝千花法輪常轉九子齊鳴一鈴獨語錯落聲如
珠貫石壇花院有一陣松颿高低吹亂除是澄公秀支劬禿總能
辨空廊有客孤寄向鐙昏獨聽似近還遠月下檐牙雨邊驛路
無此惺忪悽惋粥魚茶板只面壁僧枯聞根先斷一任山椒天風
搖夜半

摸魚兒

盪湖船

一篷兒花天酒地消磨風月如許吳娃生長吳船上只共鴛鴦爲侶
船六柱從不識愁風愁水天涯路輕橈容與問兩寺東西半塘前後
商略泊何處江南好不在中流簫鼓牽人好夢無數十年水驛風
鐙夜負了畫船聽雨臨別語怕紙醉金迷忘卻秋孃渡重來記取有
澹澹窗紗疏疏簾影隱隱數聲鶯

前調

尤維熊

正江南蓴絲風軟波光七里吹皺移來花月青簾乍滿載玉缸春
酒繅華藪將蠶殼窗兒徧換明珠繡停橈渡口認斟酌橋頭紅闌
低映幾樹水楊柳恰相對一點遙青橫岫柁樓人更明秀蜀薑
細搗吳鹽灑更倩調冰雪瀉勞纖手看送了航船暗拓鞦尖瘦明
鐙炏後纔緩櫂歸來高城一角斜月下蓮漏

水龍吟

吳歌

摩訶池上歌殘一聲何處悠揚起將連忽斷似無還有月明風細月
子彎彎花開緩緩一般情思算篆家不是漁家不是問莫是劉三妹
子夜四時堪擬變新聲我儂歡喜扁舟夜泊人家兩岸聽風聽水
白葛單衣蒲葵小扇新涼天氣又前溪柔艣嘔啞說是釣船歸矣

前調

尤維熊

五湖天水空濛一枝柔櫓衝煙破聲聲斷續三高祠下垂虹亭左
棹入前溪三三兩兩菱歌相和正員沙清淺鳧飛拍拍笑脫下紅
裙裹最是曉風殘月賸微茫一星漁火遙聞斷港纔從浦轉又
穿橋過水國陰晴江鄉兒女儘伊煩瑣怕驚他孤客篷窗夢醒又

還重作

去聲

桂枝香

蕉扇

誰裁花骨怕新裂齊紈無此圓潔想見黃昏雨足綠天雲割憐他不
入人懷裏卻生成也無員闕紫蕉衫底白荷花下晚風香辣 話昔
日山塘土物同苳席湘筠一樣清絕七寶修成不是舊時明月舊時
舊事何人記有冷螢空堦明滅最難忘處羅帷雙笑一鐙初殺山塘
賣扇
以選葉爲工近皆飾以
金繡失當時之意矣

前調

尤維熊

裁雲滿把憶小院綠天密雨初灑誰仿謝家新製市頭論價紅麴
一抹剛遮映握春蕙晚粧纔卸庭軒露坐乍停還拂流螢將下
記女伴穿鍼閒話有花骨敲斜密字偷寫便肯從人方便也休輕
借六月不借扇
吳中諺也輕容不放秋蚊入向舊幃深處低挂桃笙如水暫
教閒卻嫩涼今夜

右武邱樂府五首結夏僧房端居無俚輒仿南宋人樂府補題

之製譜山中風物希同調者繼聲焉一娛尤君首先見和其詞
尤工用同著于篇小吳軒行館書

臺城路

同嚴丈歷亭游舒氏園作

薄陰不散霜飛早園林深貯秋意水木清蒼陂陁高下澹與暮雲無
際紅泥亭子占一角孤城七分煙水最愛疏疏竹竿萬个滴寒翠
年來俊侶都散便登山臨水只恁顛顛倦柳攀條清流照鬢暗老悲
秋身世荒寒如此又畫角聲中夕陽垂地樹樹西風暮雅寒不起

翠樓吟

山行幽絕臨水數家門外木芙蓉正花爛漫無次殊愜幽
情紀以此詞

濕翠霑衣暗苔粘屐幽尋最愛清曉峯回剛路轉恰對面數峯清峭
似儂會到只三兩人家看來都好柴門小芙蓉無數一時紅了誰

料隨意閒行有芳塘花鳥徐熙畫稿水邊同照影定見我風前側帽
也應含笑怕青鳥丁寧玉容易老尋芳早向人山色一眉新掃

望湘人

用穀人先生韻

漸蕭蕭瑟瑟冷冷清清客裏如許淒戀衰柳翻鴉枯荷鬧雨子夜怨
歌先變鏡裏霜寒鐙前人瘦眉邊山遠儘哀弦一曲思歸飛起十三
箏雁數盡更更點點把孤衾斷夢一宵尋徧只文鴛繡枕記得舊
時曾薦酒痕濃澹淚痕重疊濕了小蠻鍼綫問何日纖手親攜笑勸
芳尊須滿

柳色黃

西湖秋柳用穀人先生秋柳詞韻

西子湖頭歸路繫船暮色催霽疎疎漏出斜陽便做秋來詩意春人
老去想見油壁車歸銷磨裙帶同心字有一陣西風添一分顛顛

還擬東風舊院北苑新圖南朝蕭寺幾點昏雅小坐蒼煙叢裏荷花
桂子分將一鏡新愁照他鬢影清無底縱有浣紗人挽纖腰不起

江城梅花引

一重方空一重紗采蓮花采菱花愛住吳船生小號吳娃牆內紅樓
樓外水有明月照鴛鴦宿那家那家那家在天涯雨又斜雲又遮
聽也聽也聽不到一曲琵琶漸漸西風秋柳不藏雅欲倩西風吹夢
去還只恐夢魂中太遠些

滿庭芳

扇月投懷衣香分袂箇儂道是無愁采蓮歸去佯醉臥篋篋攜取屏
山六六繩河外殘雨初收良期近一天風露無睡待牽牛句留能
幾日有門前流水催上蘭舟漸蘭舟不見野水空流欲寄銀鈎小字
趁征鴻飛過樓頭沈吟徧又愁別後不上小紅樓

天香

粉

擣麝成塵調鉛作雪秦樓一轉初試露下芙蓉雨餘篁竹滿鏡六朝
春思仙人掌上先染了葱根纖指繡領乍涇餘香金盆緩傾殘水
侵晨宿粧紅膩拂湖絲埽眉還未殘夢關心蝴蝶欲乾雙翅不信比
來下淚問玉頰成痕爲何事索寫丹青牘來有幾

摸魚兒

菰菇

買陂塘兩邊添種高荷大芋相似生成葉葉雙歧樣合傍谿流燕尾
江上水記送別西灣話到年時事故人歸未正軟柄欹風低枝鬧雨
一碧亂無次江鄉好隨意蒹絲菰米食單多在水際雞頭菱角堆
槃後草草田園風味渾不記合付與廚孃略下些鹽豉旗亭小市共
山栗燔餘村醪熟後閒買夜來醉

水龍吟

蘋花

菱歌唱斷前溪青山影裏秋江老晚風乍起涼煙不散數花開早去
鳥明邊閒鷗眠處采香人少便翠禽一點愁他難立除非是蜻蜓小
有客谿頭垂釣又句留一年過了楊花身世蘆花伴侶嫩寒清曉
隨意停舟偶然照眼添枝紅蓼向水仙祠下登蘋搴藻共寒泉茗

齊天樂

果羸

蟲蟲生就腰支細孤懸長自幽怨小尾雄蠶畫衣穉蝶未許尋常相
見案頭筠管想小寄全家一丸泥滿暖日窗櫺蛛絲捎徧畫檐短
餅笙相和淒切聽哀音微細似續還斷負坂身勞顛當門守也結蟲
天仙眷休言善幻笑人世兒曹骨凡難換戢戢螽斯一宵如雨點

桂枝香

黃蜺

春潮長處正隔浦聲喧檝頭船聚似鬪春泥不用笞簪漁具從來論
斗平量慣敏舡呼麤錢拋與有時亥日漁娃白足筠籃提取 俊味
江鄉堪數比青鯽白蝦羹湯同煮合口椒辛薄醉想伊風趣兒童不
識螺名扁笑且食蛤蜊知許湯溫甲卸配他早韭翦來新雨

滿江紅

九日同鐵門登鳳皇山頂尋女教場望江用倦圃竹垞錢

唐觀潮韻

四面青山放江水適當其闕流不盡南朝遺恨中原如髮更殺一圍
傾國笑誰橫萬弩迎潮發只茱萸醉裏詫漂零人吳越 花欲笑簪
邊雪雲欲擁巖前月巖名問男兒何用置身高絕百感茫茫隨處有大
江滾滾何時歇恨觀濤僕病未能來中秋節

買陂塘

題胡維君廬山識面圖

珍傲宋版印
插清江成峯成嶺湖山如此明秀何人小坐槃陀上高挹匡君衣衷
開笑口道蓮社羣賢待爾相尋久扁舟落手問何不乘風開帆捩柁
數徧翠屏九平生事布韞青鞵都有游蹤尙欠江右五峯一一雲
中問與老人期何後牛馬走恐待我歸來頭白成衰醜觀河面皺想
意外奇逢圖中人到相識定如舊

金縷曲

閩僮黃姓汀產也湘湄名之曰汀鷗爰紀以詞

欲問伊鄉里有詞人小名錄就當筵須記萬里家山誰馴得漂泊黃
童年紀夢不到汀洲蘅芷道我主盟三十六肯相從浩蕩江湖底僮
約在煙波裏可能便逐漁兄弟買陂塘綠蓑青笠船頭沙觜配箇
樵青都不惡婉婉阜羅鴉髻應不羨風標公子莫度荔枝香一曲怕
回腸容易鄉思起謂不信如春水

酷相思

苦雨

屋角鶉鴉催不去和簾外流鶯語問裏湖外湖會到否朝來也瀟瀟
雨晚來也瀟瀟雨 涇了清明寒食路把杏花期誤只孤負討春人
此度春去也留難住人去也留難住

菩薩蠻

何夢華半塘春泛圖

青絲纜細蘭橈艤濛濛人立垂楊裏三十六鴛鴦一堤春水香 半
塘春好處總是藏鴉樹樹下記兒家出牆姊妹花

太常引

夢華以葉小鸞疏香閣眉子研銘拓本見示屬爲賦之
掃眉人倚裏羅寒月子對鸞鸞笙鶴去瑤天算只有蟾蜍淚潛 琉
璃匣啓櫻桃雨潤長定試麋丸小字讀迴環又想見當時遠山

臺城路

梅華帳額

珊瑚海底枝枝軟玲瓏翦碎寒月羅帳如煙銀鈎不動小積半牀香
雪移鐙挂壁怕骨冷魂清玉龍吹徹漠漠梨雲江南路向此中覓
年來何遜蕉萃記東閣詩篇西磧遊屐鬢點吳霜夢殘舊雨髣髴屋
梁顏色翠禽低說正人倚高樓裏羅寒絕待訴相思玉參橫永夕

疏影

花影吹笙圖

空庭潑水正玲瓏澹月簾影垂地悵望銀河閒弄參差箇儂知是誰
思橫枝清瘦疏花活漸篩滿薄羅衫子只枝頭翠羽雙栖闕見那時
情事難忘黃昏院落畫闌十二曲曲曲同倚半攏春纖半度脂香
炙暖一行銀字年來白石風情減有自作新詞誰記但每逢花月嬋
娟便想畫中雙髻

百字令

阮雲臺閣學重葺曝書亭命工摹竹垞圖自和竹垞元詞
二闋余亦繼聲

鴛鴦湖上記櫂歌來往扁舟曾泊載酒江湖人在眼渺渺微波難託
八萬卷書兩三竿竹閒想歸田樂百年如夢暮雲幾葉零落 當日
雨裏芭蕉水中菡萏位置煩斟酌舊觀頓還圖書好依約黃簾綠幕
詞客有靈先生應笑此子宜邱壑他時重到灸笙須喚菱角

摸魚子

題李武曾徵君藝蘭圖用竹垞集中灌園圖韻

問先生灌園老矣尙餘幾稜青畝平生迷作騷苗裔小寄外孫壑白
歸隱後渾不記上林花木春明柳遂初賦就想堂北春濃陔南人健
一笑且開口 堂前樹秋錦勝如錦畫西風幾度搔首天涯芳草行
吟徧荃蕙化茅都有交耐久算只有南鄰朱老長攜手別無恙否約
雜佩紉秋寒泉薦菊來訪橘中叟

國香慢

媚蘭小影為夢華題

真色生香有小名試錄雅稱孤芳幽居自憐空谷未嫁王昌定記宮

牆留字聽鐘聲催月斜廊用明宮女媚蘭仙子詩無言但凝睇一寸愁心多少

思量彩雲天遠處想明眸秀鬢霧閣雲窗玉梅花下誰念蕉萃何

郎尚有三生舊約怕錦瑟今似人長還應只如此楚楚眉痕澹澹明

粧

紅娘子

古祕戲錢

金鑄鴛鴦牒土蝕相思骨姹女風流沈郎輕薄秦宮偷活看雙飛蝴

蝶正團圓任漫天榆莢覆雨翻雲狹地久天長恰蠟視橫陳神傳

阿堵夢殘金穴笑人間駃女與癡兒買春風時節

金縷曲

題雲臺閣學修書圖

上苑春如綺護重重琅嬛祕笈花光雲氣東馬才名終賈歲朝罷橫
陳圖史早位置筆牀研几天上愚懵仙儘有讓宮中元九呼才子紬
萬卷倩雙髻使星重指錢江水看紛紛珠墳笙典赤文綠字椽燭
兩行官吏散學士又修書矣問福慧如公能幾應念書生寒骨相短
鐙檠昏對牛毛細旁匿笑玉川婢

清平樂

題張淥卿花陰填詞圖

花陰漸轉衣上春痕淺圓月一規人半面好箇深深庭院 玉簫金
管都宜偷聲減字休遲知否露寒風峭紅兒小立多時

洞仙歌

題蕊宮花史圖圖十有二人

碧城深處有闌干幾曲幾疊屏風護羣玉正巫雲滿峽霄露承盤三

珍傲宋版印
面海看浴鴛鴦卅六 一年春好處風信番番兩兩仙人小名錄隔
座辨釵光下九初三算佳納閨年須續試屈指花朝是幾時怕歲歲
月員時時花落

摸魚兒

送淶卿入都

甚怱怱驪歌催發江天雲物淒緊西湖鴉舅初黃候做出別離風景
江上艇早載著曉風殘月和愁等哀鴻成陣向越角吳根燕南趙北
相對一繩整 長安道十丈紅塵埋軫五侯八貴朝請書生馬狗衣
鶉結料爾爲郎無分堪一哂道我已無家隨處漂零肯酒徒歸盡問
壚畔燕姬車前騶卒何處醉眠穩

又

淶卿自都門歸復遊山左作此贈行并寄黃小松司馬陳
曼生上舍

有征鴻南來北去道逢旅雁相語差池短翼三千里爲是栖栖何苦
嘗險阻又破帽殘衫重蹋西陵路搖雲散雨總難忘當時西園賓客
梧竹對衡宇 人生事銷魂最是羈旅今人管鮑如土一錢不直張
三影怨曲旗亭空度休見妒道老矣蛾眉金綫無心作去事何知許
且問訊陳三寄聲黃九慷慨爲君舞

又

寄淥卿

聽烏烏城頭畫角馬頭風色催暮重來人已漂零慣衫上淚痕難數
來又去恰子野兜孃都在吳城住酒邊傳語道有箇吳儂夜闌沈醉
羅帕喚題句 青樓夢三生杜牧還作去而今絲鬢千縷雛鷺乳燕
曾相識想在綠陰深處風吹雨問秋色誰華可似江南否羈懷最苦
但卻扇風情題襟心事都付倦飛羽

水龍吟

湖心亭夜泛追憶舊游俯仰身世渺渺兮余懷也

月痕都化涼煙雙堤沈在涼煙裏蕩華露溼菰根風戰瓜皮船艤一寸秋心三分是月七分是水看湖心點點山山不斷渾只露依微髻忽憶去年此日伴故人斂舷同醉笑橫長笛倚歌小海有魚龍氣游倦成悲離多易老居然千里但回船夜半圓沙拍拍喚眠鷗起

又

人日寄故園諸子

草堂人日梅花可憐又向天涯度華前思發雁邊書遠道衡空賦風颭鐙初雪消寒未春愁如許算一般客裏阻風中酒還不及西湖住料得故人傳語欲題詩故鄉何處也應難忘盟鷗池館黏雞窗戶子夜歌休辛槃春老丁年人去但柳條弄色年年仍作舊時眉嫵

齊天樂

童佛菴有素冊爲蝨魚所蝕其鑿空處皆肖蜨形殆天巧

也詞以寫之

近來不食人閒字滿腔都是春恨青簡生涯白蟬身世幻作漆園夢
影羽陵困損算不似花閒栖香差穩莫羨神仙蛻餘且就此中隱
有人曝來永晝比夾雪新籤白描副本栩栩蘧蘧魚魚雅雅兩翅尙
黏殘粉滕王休哂是癡絕書生香奩吟吻展向春風半窗芸葉冷

菩薩蠻

金釭釵粟紅如許爲誰擁髻淒無語一夜雨潺潺春風樓上寒玉
鞭斜墮馬知在垂楊下低語祝梅花上元須到家

又

暮雲重疊山如織一痕淺黛依微碧此際有人愁夕陽山外樓春
鐙初試了寒到春衣峭莫是不歸來玉梅開未開

又

月痕移到梅花澹畫樓人立春寒淺殘雪未消時一枝還一枝銀

屏雙灘鶻香篆和煙碧相見便嫣然問郎恣意憐

又

東風皺得春痕重香羅深護梨雲夢道是太淒迷隔簾殘雪飛
蕭
郎歸又晚春勝如花淺何事有閒愁玉簫吹兩頭

又

吳儂何必吳中住五湖便是三生路船小慣藏春千絲網越人三
年留一笑底事催歸早一路遠山多畫眉人柰何

買陂塘

自題山陰歸權圖

問年年阻風中酒江湖人竟歸未居然一權衝風雪粧點蕭蕭行李
圖畫裏有萬壑千巖送箇人雙髻剡谿休擬且霜破黃柑鐙挑紅粟
晚飯柁樓底 移家好莫認鴟夸西子鏡湖他日須賜千絲細網三
生石兩槳劃開春水歸去矣算泛宅浮家儘可稱鄉里權歌聲起試

擁楫煩卿扣舷和汝此曲定能記

又

穀人先生題淥卿露華詞未有見及之語依韻奉酬并寄
都下諸故人

算年來此中日夕淚痕被面如洗鷺鷥燕燕張公子空皺一池春水
誰得隨便白石玉田都付旗亭裏酒闌人起想紅燭筵前烏絲闌底
儘做別離味 知音少前輩愛才會幾當時沈范堪擬春風傳唱揚
州路齊卷珠簾十里我倦矣似漂轉飛花未許游絲繫舊遊應記但
寄語燕臺酒人相見有口且深閉

河傳

題夢華絢雲圖

小字須記喚爲雲暮暮朝朝見君送君南浦愁復深千金訓他一笑
心阻風中酒年年過誰伴我且賦風懷左謝芳姿網千絲他時蠶

雄粉蜨雌夢華屬意
一婢故及

探春慢

淥卿自山左來杭合并西湖未及十日卽爲東阿之行酒
邊索贈書以爲別

慢水搖堤飛花撲帽相逢又是春半俊侶疎時鈿車歸後小結嬉春
閒伴誰記重來客算只有垂楊青眼問伊昔日風流鬢絲何事零亂
卻笑一年一度渾不似定巢王謝雙燕寒食光陰天涯情味消得
幾回相見還共西湖約怕尙有輕風吹轉莫滯游蹤高樓人正凝盼

洞仙歌

寄素君

綺窗臨水挂一重簾子簾外垂楊畫船繫道春風正好催放輕橈全
不管先把箇儂催起 嘔啞聲未遠轉箇灣頭眼底居然便千里不
見一重簾簾外垂楊又何況隔簾雙髻算臨別無言忒忽忽有曲曲

谿流是伊清淚

又

小桃落盡又春寒側側過了今年小寒食便鷓鴣怨雨蛛網黏花歸去也春已三分之一 昨宵淺夢裏夢也無憑夢裏人人更無力軟語任憑肩低髻愁眉是鏡下舊時顏色只忘卻歸期約何時猶自說高樓杏華消息

買陂塘

蘭泉先生招集瑪瑙寺看牡丹分韻得更字述以此詞

又惜惜滿湖香絮一年春已將盡東風收拾閒紅紫并作者番芳信風乍定有臥穩狸奴日午花陰正鉤簾試問問花底年年看花伴侶得似此時俊 佳招踐連日陰晴難準能來須是乘興沈香應詔關何事薄醉被人呼醒文字飲看白髮嬉春一老紅闌凭擘牋賦韻儘雀舫移頻鈿車歸了後約試尋更

又

方臺山屬題冰壺夫人桃源春泛圖

看浮槎坐來天上一篙春水初暖川原遠近都如綺十里明霞新翦
紅一段向鏡裏盈盈同照春風面阿誰曾見算只有紅襟掠波雙燕
隔水定偷眼 仙源好已熟胡麻仙飯休歌水遠人遠當年便笑天
台侶不解人閒何戀歸緩緩愛輕浪魚鱗容與中流半流年暗換但
黃竹箱開縷金衣試紅雨尙應滿

水龍吟

語兒道中萬綠如水澹日微陰時漏疏雨扁舟搖兀其間
爲賦此調

是晴還是微陰濛濛好箇江南路桑陰兩岸竹梯橫閣最深深處去
鳥孤明連山積翠夕陽界住正扁舟有客微吟淺醉譜腸斷方回句
又是一年羈旅一年春又隨人去換他幾點漚邊鷺外疏疏殘雨

圓鏡冰寒生綃紅潤也應淒楚待歸時細問香銷夢斷定思量否

清平樂

春湖吟社扇面爲夢華作

兩湖如鏡雙照桃鬟影花外夕陽紅不定又是畫船歸近
去年煙雨溟濛今年花月惺忪斷送一生顛顛只消便面春風

國香慢

袁壽堦屬賦紅蕙

乍轉光風自二閭去後九畹滋同孤芳肯隨荃化忽訝春容莫是獨
醒良苦倦行吟薄酒微中幽衷與誰語寫入朱弦怨曲纔終
湘江江上水便覺來淚滴勻染難工荷衣顛顛未應綬帶垂紅回首金闈
樓外記薛家小妹初逢香魂便能返澹粉輕脂終恨惺忪

浮眉樓詞卷一

浮眉樓詞卷二

吳江郭慶祥伯箸

仁和許增邁孫刊

疏影

舒衫受落花圖

春陰似墨正輕衫乍試何處橫笛應是高樓不管清愁便訴江南消
息玉人未醒梨雲夢想獨步冰苔猶溼恁禁他翠裏天寒無數落英
如積苦憶西園清夜酒邊出素手曾共攀摘漸老何郎便約重來
不是舊時月色東風衣袂憑誰問怕只有淚痕留得判一生消受春
愁點點唾花凝碧

水龍吟

厭勝鏡徑二寸有奇背列祕戲者四女裝絕似武梁祠像
六朝物也

分明一片新荷團團照見鴛鴦睡秦時明月漢宮春色唐家遺事影
裏鸞孤盤時龍寡物猶如此笑何妨注就蟲蟲燕燕添四角中央字
長定循環纖指暈紅潮背人偷視宿粧慵整長眉未畫慊慊情思
三閣綺羅六朝金粉而今何似看土花淺碧爛熳多分是銅仙淚

紅情

題二娛鷗夢圓圖用玉田韻

生香活色有水天閒話憑肩語密除卻鴛鴦只有眠鷗似相識三十
六陂舊夢明鏡裏低徊潛憶問微步一餉凌波羅鞵可曾溼 小立
髻鬢側想明月那時流水今日春風靈液澹盪其間浪痕碧自恨采
香太晚重到也紅衣非昔又況畫船艤處船中玉笛

沁園春

二娛爲余題蝨蝶卷子比物象形裁雲縫月後有作者未
能或之先矣酒酣以往逸氣全涌閒爲變調以攄鬱塞之

懷并示二娛

鑽紙蠅癡伏案螢乾男兒可憐笑吾其魚矣人言善幻遽然蜨也或羨成仙五蠹書成一生花活遊戲其間然不然君休問看此中有鬼蟲亦能天 爲君試質前賢更有箇吾家博物傳是蒙莊闊達未離文字謝郎輕薄多爲詩篇磊落景純蟲魚詮釋鳳子春駒有闕焉亡應補任叢殘科斗零落蝸涎

齊天樂

北山旅館圖用穀人先生韻爲華秋槎司馬作

十年載酒江湖徧不歸如此湖水小艇鳴榔低檐結網穩住一家深翠畫圖寫意問選箇江鄉西湖有幾鴨脚黃邊幾人同此夕陽醉當歸故鄉應寄笑薛宣東閣真欲相吏遂裏伊涼胸中雲夢暗老英雄身世壯心不已道種菜閉門漸諳斯味何況鱸膾秋風斜日裏

洞仙歌

書素琴校書扇

當年桃葉向渡頭曾見問姓分明掌中燕把舊時衣袂與說相思東
風裏可記淚痕曾染 厭厭三爵後素女琴心忽發狂言有誰管教
寫折枝梅翠羽啾啾定闌見玉人清怨肯等到闌干月明時便幾箇
黃昏也都情願

又

題錢叔美爲疏香女子畫梅用袁蘭邨韻

東風著力恰雪痕微逗略解春情便應瘦似那回曾見隔箇窗紗修
竹裏翠袖暮寒時候 江南二三月豔紫妖紅兒女十_平枝五枝繡
誰得比孤清一斛珠量除聘取海棠消受擬待到昏黃月微明倩玉
笛橫吹看珠簾秀

風蝶令

秋影樓圖

雁齒紅橋近烏衣曲巷斜水天閒話記些些六扇冰紋榻子慣藏他家
春燕雙栖地秋風八月槎重來那不感年華猶傍水楊柳樹問伊

百字令

題蘭村南園春夢圖

東風何苦只送將春到難留春住落絮游絲無氣力還自飛來飛去
白水橋梁紅泥亭榭人說南園路畫圖省識看來已是前度莫倚
錦瑟筵前楚腰掌上年少能才語記得些些惆悵事便費蠻牋無數
玉局彈棋銅槃遞淚此夢儂曾作去去年今日桃華亂落如雨

喝火令

莫愁小像爲汪紫珊姬人綠玉作

文杏栽梁柱流黃織畫紗春風留住六朝花願作紅襟雙燕飛去入
伊家有箇人如玉看來略似他重幃初卷繡帶斜只少耳邊朱暈

一此些只少阿侯膝上小語學嘔啞

高陽臺

隨園席上贈別疏香

暗水通潮癡嵐閣雨微陰不散重城留得枯荷奈他先作離聲清歌
欲遏行雲住露春纖並坐調笙莫多情第一難忘席上輕輕 天涯
我是漂零慣恁飛花無定相送人行見說蘭舟明朝也泊長亭門前
記取垂楊樹只藏他三兩秋鴛一程程愁水愁風不要人聽

買陂塘

信宿隨園頗極文燕之樂將歸之夕蘭村以秋夢樓圖索
題黯然賦此

小紅樓居然百尺文窗了鳥深閉豈知中有悲秋客夢與碧雲無際
湖海氣只打疊柔情不斷如春水偷聲減字問白石玉田金荃蘭畹
多少可憐子 浮名好低唱淺斟何似爲誰此景輕棄六朝山色雙

眉嫵換了青衫從事我醉矣想葛帳西華那有桃花米能謀酒未怕
江上荻聲堦前蛩語漸漸有秋意

時蘭村將入都謁選

祝英臺近

題梅卿女史倚竹圖

玉釵長金釧瘦濃綠翦雙袖刻徧琅玕又是一詩就問他翠羽三更
擗龍半夜可窺見繡鞵冰透 算佳偶鳳觜天外尋難得似舊人否
磨鏡劉楨平視也低首同君一樣西家牽蘿補屋定念我暮寒時候

柳梢青

贈琵琶伎

直得魂銷髻簪寒玉袖卷輕綃半面猶遮四弦入破涼月初高 天
涯淪落相遭酒醒處天風海濤翠被秋深烏篷露冷一樣今宵

長相思

荻花殘蓼花殷一樣秋風有兩般紅紅白白看 笛聲乾角聲酸行

盡江南無數山征衣漸漸寒

好事近

效朱希真體

瓜步晚潮生一峭布帆百里酒醒鐘聲何處出金山寺裏
金山對
面是焦山睡著兩鬢髻只有半鉤殘月照船中
篆起

又

歸舟同竹士作

何處是儂家歷歷青山無數青到一重樓上對箇儂眉嫵
朝朝江
上望歸船江住見山住指點片帆飛過在青山斷處

闌干萬里心

自題浮眉樓圖

濛濛絲柳不藏秋隱隱疎簾半上鉤見說年年愛遠游一重樓兩點
眉山相對愁

高陽臺

錄別

玉局中心金釭照眼悲秋人又長征擁髻淒然背鐙直是愁生三杯
兩盞將離酒怎禁他和淚同傾太淒清蛩語聲聲雁語聲聲 銅籤
屈指無多路說當時歸櫂一半曾經後夜明朝爲儂細算郵程鴛鴦
湖上條條柳望前頭有座旗亭肯消停風也須行雨也須行

貂裘換酒

十月一日偕鐵門倪米樓同游冷泉亭至白衲盦下山經
蕭九孃酒壚泥飲而歸屬湘湄作寒壚買醉卷子紀以此
詞湘湄曾與余雪夜同宿酒樓持火入山題詩石壁上此
圖亦不可無詞也

雅舅紅如此正千山萬山夕照不知幾里忽見青旗高樓外其上有
翩翩字有隨分橙黃筍紫我是酒徒元無賴索銀餅莫笑麤豪氣鷗

霜解可容貰 四山積雪危闌倚
話當時風懷酒膽故人老矣不向
冷泉亭下醉負此松風兩耳
況落葉紛紛而至寫作畫圖傳也得要
壚頭貌个雙了髻渠能記十年事

附前調

袁棠 湘湄

誰畫荒寒景但蒼蒼暮雲一片亂峯齊
暝幾陣盤鴉催風色又作
去江干霜信況遊子衣單誰省淒緊客懷無着處只山樓一角斜
陽賸紅樹外酒旗影 題名重向壚頭認算青衫十年著破轉蓬
無定莫更當杯歌忼慨擁髻清愁未醒定說到漳濱人病舊雨不
來前塵在也依稀隣笛山陽聽題此卷誌我幸

又

朱春生 鐵門

如此秋光好看西湖亂山深處楓林紅了十里沿谿彎環路不借
一雙能到且莫管亂雅殘照記取年時沈醉處揭青帘便索銀餅
倒煨落葉暖清醪 舊愁新恨知多少似今番清游有幾暗傷懷

抱自喫天台胡麻飯乞食何曾一飽悔不作酒家傭保一樣漂零
風絮影看當壚人也朱顏老休怪我鬢霜早

疏影

帆影和米樓韻

爲誰送到恁斜斜整整驀地來悄暮雨初收疊鼓猶催殷勤澹月留
照支筇愛喚秋江渡問波底去來多少只兩邊純浸遙山一霎半湖
遮了 記得離筵江上舉梧尙未勸聽說風好猶自憑闌不覺回頭
已亂一行飛鳥知他寂歷斜陽外消幾度醉眠欹倒怕有人腸斷登
樓誤認粘天衰草

金縷曲

題米樓夢隱詞卽用其集中紅豆詞韻

燭灺更闌矣怪今宵聲聲落葉都來窗裏細字蠶眠無多幅不信愁
人至此看眼底詞流有幾偶作天風海濤曲又吹花嚼出紅霞蕊翩

然跨琴高鯉 天涯別緒紛難理漫沈吟舊歡如夢流年如水說著
江南腸斷句中有淚痕隱起只合付薛家車子張緒漂零尤表遠謂
卿二 儘時人笑把周秦比莫寒了調箏指
娛

又

題汪飲泉秋隱庵填詞圖

十里春風路有伊人裁雲縫月移宮換羽身是三生狂杜牧今日鬢
絲如許只逢著秋孃能賦問訊汪倫情何似也桃花亂落如紅雨君
莫怪作癡語 竹西歌吹依然否但年年吳公臺畔鬥雞兒女腰鼓
儘消三百副誰唱康郎樂府況白石揚州詞句何必紅紅方能記倩
笛家吹入蕢洲譜蜀井水在何處

賣花聲

姜怡亭葬女郎于西湖作瘞花圖乞題一詞

小雨夜惜惜寒戀重衾朝來香徑怯相尋不信東風魂不斷葬得深

深 舊事暗沈吟顛顛而今長堤宿草有紅心翻羨當時狂杜牧來
便成陰

祝英臺近

怡亭秋晴訪碑圖

石排衙窗列岫往事記重九閃閃寒雅如墨點雙袖看君走上層顛
摩挲斷碣全不怕藤纏雨溜 試搔首要問一片韓陵共語尙堪否
近日磨崖山骨斲應瘦年來愛注蟲魚肯分金石笑茶覆懷中人有

夢芙蓉

蘭村寓大佛寺僧樓同人畢集湘湄爲作湖上雲萍圖紀
以此詞

北風江上冷正湖天黯黯客懷淒緊凍雲幾葉流出片颿影故人期
尙準楓林休負霜信佛屋蕭然有兩三倦侶吟到夜鐙暈 同調相
逢一晒中酒悲秋已是三生病畫中眉嫵不似舊時靚雁飛渾未定

夕陽猶戀寒陣如此江山又怱怱別去十日醉應肯

清平樂

徐山民吳姍姍夫婦柳陰雙槳合冊屬題

鵝兒搓就小試調酥手眉葉腰身誰比瘦春水生來先皺
芳草一路芊眠江南春盡如天不信別家樓上陌頭柳色年年

醉太平

蘭村移居玉華樓

煙雲一牀煙波一囊移家仍住僧房可青山一窗
平林夕陽長橋夜榔只多十里湖光見南屏曉粧

暗香

宋西樵爲其妹作梅花于扇湘湄徵君屬賦之

萬花開落怪東風最早吹醒寒玉只有廣平一賦千秋擅幽獨憐取
山礬是第想雷岸書回應索便說是便面春多香冷不盈握
茅屋

翠裏薄正日莫天寒絕代空谷怨蛾自綠愁點當時額黃角高臥袁
郎記否會小小珍禽同宿算合喚楊妹子爲題滿幅

疏影

湘湄有所恨畫青梅子一枝以寄意霜辛露酸別有寄託
非牧之詩意也以余有元白之好知拂面花故事屬倚聲
以紀

玉梅未落有枝頭點點酸意先著齒冷吳孃不管春寒臨風自弄霜
角高樓也有人橫笛但樓外翠禽偷覺試問伊葉底清圓莫認綠陰
成幄 記否年年此際鸞桃已結子蠶豆初熟山店燒春寒食時光
陌上草痕新綠消他幾度沈沈雨已過了杏花錫粥又教人腸斷江
南只恐方回難讀

金縷曲

山民出示 國初諸公寄吳漢槎塞外尺牘輒題其後

幾幅叢殘紙是當年冰天雪窖眼穿而至萬里風沙寧古塔那有塞

鴻接翅更緘寄烏絲彈指

二集名

一代奇才千秋恨換故人和墨三升

淚生還遂偶然耳

諸公衮衮京華裏只斯人投荒絕徼非生非死

徐邈顧榮皆舊識

立齋梁汾

難得相門才子

若容

歎不僅憐才而已感慨何

須生同世看人閒尙寶瑤華字只此道幾曾棄

生查子

堦前一片苔青到牆陰住羅幃是何人小印香痕去 愁隨鑪篆長

影共鐙花語關了碧紗窗各自聽春雨

買陂塘

二月十四日坐江山船行諸暨道中山水清妍雜花生樹

傷春傷別情見乎詞

放輕船青山影裏欹斜帆葉低挂溶溶漾漾平堤水誰把越羅新研
花事乍已過了花朝春月圓今夜柁樓飯罷有新柳泥人閒鷗窺客

愁重酒難把 當年事想見鴟夸妍雅扁舟容與其下一峯最遠眉
痕澹絕似苧蘿初嫁誰共話算如此江山少箇人如畫先生歸也問
春雨樓頭杏花賣未和淚寄羅帕

金縷曲

得淶卿山左書并見懷之作走筆寄答

好在張公子正經年思君不見飛來片紙不過相思加餐飯難禁淚
痕如洗更一一新詞同寄宛轉漂流都不訴但略言青鬢今如此抱
玉泣且休矣 檳榔滿斛渾閒事算天涯相攜花下不如歸耳若得
江鄉比隣住隨意孤村小市有舍北舍南春水鵝鴨往來蒹葭賤種
湖田薑蔗供租稅只此願幾時遂

沁園春

寄伯生

一別三年不見蔣生可憐酒徒記長安市上狂歌痛飲盧溝歸路駿

馬名姝牧豕公卿爛羊都尉笑爾盈盈公府趨因君問怕涉南士少
歷下亭孤年來豪氣銷除便載酒江湖失故吾有白頭老母是兒
可念紅粧少婦夫婿言殊歲歲依人年年下第領底髯鬢漸有鬚都
休矣看抱關吏賤處士聲虛

百字令

春盡夜酒醒有作

沈沈細雨又一番春事一宵將盡判與憎騰扶醉過酒到無慙偏醒
再爇餘香重燒紅燭惜此須臾景教添半臂薄寒今夜猶賸絕似
有客天涯年年此度先在河梁等刻意欲裁腸斷句筆底落紅成陣
謝女檀郎濃香淺夢那有閒心性中年哀樂淒然自看雙鬢

水龍吟

題陶鳧鄉客舫填詞圖

欹斜幾扇烏篷消磨詞客江湖老阿誰畫出微茫煙樹翩翩沙鳥茗

嘗往來當時相見中山風調儘船頭獨酌船舷獨劬除漚鷺無人曉
欲放扁舟何處路彎環牽去絲風裊東禪寺畔相思樹底小紅猶
小我若相逢阻風中酒年年都好笑恹恹回首煙波已過卻松陵道

新雁過粧樓

漢宮雁足鐙

別苑離宮傳遺製分明燭影搖紅一行低照三十六處秋風料得調
箏孤影裏伴他促柱月明中最惺忪暮傳蠻蠟昏綴釵蟲誰憐長
門永夜正恁時鐙暗聽徧征鴻寒鴉雖冷猶帶曉日曛曛羈臣帛書
難寄但悵望甘泉遙舉烽朝來看有成堆紅淚先滿金銅

月華清

蜀王衍停空鏡

秋老蟾蜍春迴鸞鵲故宮鉛水猶冷蜀道青天鑄出一丸孤影想當
日媚臉傳紅定照見醉粧初醒誰省向麗情集裏芳名細認記否

良工質瑩正繡幌低懸綺窗幽靚尖裏羅巾有箇如花人並算儘隨
金盃漂零問可似玉奴長恨堪哂怕後來花蕊宮詞難詠

瑞鶴仙

白玉麻姑像

白雲飛一片是吹來鶴背風鬟凌亂方平舊曾見述庵認少年狡獪

當時人面良工誰碾定偷闕蔡經宅畔問翩然何處凌波東海近來
深淺 堪念一杯春露一擲丹砂年華都換游仙夢斷垂玉筍淚痕
滿想瑤臺月下冰綃帳底妒殺雙成女伴記有人手爪相如比伊較
暖

水龍吟

蒼龍嘯月琴

刺船海上歸來枯桐蛻骨寒雲裏大魚出聽瘦蛟潛舞誰吟波互萬
竅皆暗一丸初上四山如洗有老漁夜半拋來鐵網珊瑚樹收齊起

欲把冰絲偷寫怕滄江百靈騰沸蘇門人杳廣陵散絕世無此耳
黯黯龍文惜惜楚籟匣塵滿矣但好天良夜魂清骨冷抱金徽睡

臺城路

題徐縵雲今宵酒醒圖

阿誰抵死催人去樓頭五更鐘動玉筯痕垂銀荷灰燼消得幾番潛
送如塵似夢有萬疊山低一篷愁重月曉風殘離情別恨此時種
江郎賦情漸減送君南浦路若箇曾共白雁橫天秋河絡角江上夜
潮初涌薄衾孤擁想隔著高城水精簾控吟到銷魂瘦肩山字聳

高陽臺

重逢素琴較書

斷夢牽雲微波怨雨重逢故國深秋只隔經年玉簫已訴離愁梁塵
漠漠飛難盡爲雙栖巢印猶留下簾鉤掌上迴身鏡畔迴眸 思量
處處堪惆悵有蘭釭影事桂檝前游當日絲楊而今解拂人頭江東

才思隨年減怕雲英見也先羞一齊休銀甲彈箏且合伊州

憶舊遊

題彭甘亭淮陰鴻爪圖

記相逢市上偶語橋邊共識狂奴斗大山城裏看無雙國士多在窮
塗高臺釣絲飄處淮水正舒舒問照影征鴻而今可認舊日頭顱
愁余此重聚又白下秋深木末亭孤回首當年事話王孫老矣乞食
游吳羞他少年問訊長劍佩能無更有箇官人蠻雲蚕雨唬鷓鴣謂二
娛

又

辛酉秋重過得月樓美人已遠流水無際卽事悽眷殊不

勝懷屬湘湄作山塘感舊圖因題此解

又秋舫疊鼓珠箔飄鐙隔水樓高試認雙栖處看文紗六扇舊綠都
銷隔窗玉鉤閒挂簾影黑周遭歎水遠山重春歸不信直恁迢迢

無慘此重省記子夜休歌午枕回潮欲話吹簫事問二分明月何處
今宵只有應門楊柳還學沈郎腰賸當日船孃斜陽喚渡斟酌橋

清平樂

惜花仕女卷

獨兒撼起日影闌簾未屈指春光今賸幾架上荼蘼開矣 褪來袖
複胸前耳璫一半猶懸除卻橫陳時節者回模樣堪憐

聲聲慢

西湖寒夜懷淥卿山左

酒波暖處鐙暈寒初客愁最苦消凝鏡裏年光誰念暮景飛騰西湖
月荒沙白剩南山尙見高稜定笑我向危樓獨上曲檻孤憑 忽憶
故人千里欲舉杯相屬喚恐難膺雁字回時須寄一幅吳綾齊州暮
煙九點怕柔魂飛夢無憑待見也問今宵成夢未曾

滿庭芳

風颭窗鐙霜沈街柝客懷鄉思相撩一眉寒月淺澹畫無慘隔巷不知何樹到更殘轉自蕭蕭難忘處高樓此際心字正香燒也應人倦矣下帷小玉滅燭輕綃有雲屏幾曲圍住春嬌嘗記寒宵呼酒愛看伊登頰紅潮還能否只愁酒醒依舊是寒宵

臺城路

索張墨池畫僧廬聽雨圖

生平不分江湖老而今鬢絲如許羅帳鐙昏孤篷浪白何似僧寮且住憑君畫取也未要荒寒十分淒楚山色湖光濛濛更著幾株樹當年俊遊伴侶有沈雄騷賦激烈雞舞一半飛騰青雲自致一半已埋黃土壯懷漫與只埽地燒香佛前鐙炷歸到西窗泥他深夜語

又

題米樓高山流水圖

世間無事無三昧惟愁會心人少半死桐枯七條絲細未識此中何

好有人絕倒正水遠山長獨移孤棹寂寞千秋也應直得絕弦了
知君一襟幽抱問惜惜琴趣幾箇同調夢裏庵荒蘆中士賤容易國
工先老君有蘆中秋瑟詞波平風小聽門外挈音是儂尋到若訪成
連刺舫歸及早

醉太平

蓮衣詞爲米樓作

紅衣帶接紅顏酒醺休翻驟雨新荷怕鴛鴦夢多 前溪緩歌中流
素波夕陽一舸重過又西風奈何

又

題黃退庵友漁齋圖

庭中碧梧窗中素書看君便老江湖有沙鷗笑無 東家酒壚西家
狗屠客來高坐誰與是煙波釣徒

又

馮玉如月夜聽簫圖

宵寒更清簫聲獨聞碧桃花落紛紛又人閒莫春而今鄂君名香
細熏只他涼月殷勤照秦樓夜深

壽樓春

夢華屬題壽華樓圖

高樓浮雲齊見交疏綺戶飛級唐梯最好肩扶同凭手纖偷攜看畫
取雙蛾眉是曉來春風吹低問淺笑粧成閒情定後前事可重提
天台路桃花谿記量珠未穩尋夢多迷漫恨親分釵鳳暗通靈犀詞
有託詩無題分此生銀河東西算人欲天從披圖有人應妒伊

柳梢青

窗戶誰敲分明花外竹影微搖卯酒醒初丁簾下了閒到無慘別
離魂夢偏勞似八月朝潮暮潮守到黃昏上來紅燭又是今宵

買陂塘

題陳雪樵留春小舫圖

記曾經千巖萬壑中流小舫容與越孃纖手青絲紉揀繫垂楊多處
來又去總負了鶯鶯燕燕匆匆語知君小住便挈榼三升掠波兩槳
敲響水窗戶 人間世莫道春光難駐任君青鬢如故黃皮袴褶從
軍樂已換綠蕪煙雨儂也誤算略有二楹草閣分湖路頻年羈旅儘
竹外花開江頭水暖閒殺舊鷗鷺

洞仙歌

題張晴厓聽香圖

蟾蜍寒玉滴露珠清曉擣麝成塵暗香繞怪靈犀一點鼻觀先通人
微笑莫是遠山須掃 書生病風手側盾橫磨底用微揜裏羅小要
見玉纖纖報墮金釵難得露麻姑長爪算我若當筵索新題便背上
神鞭也都判了

序

昔楓江漁父爲詞苑叢談一書余覽之而惑焉夫流品別則文體衰
摘句圖而詩學蔽花庵淫縟爭價一字之奇草堂噍殺矜惜片言之
巧乖道繆典鮮能通圓是以耆卿騫翮于津門邦彥厲響于照碧詞
至北宋而一變石帚玉田理定而摘藻梅谿竹山情密而引辭詞至
南宋而又一變若夫吹律風騷調鐘韶濩寫纏絲于香草寄哀豔于
紅牙則又遙原濬波酌而不竭婁斤般墨高下在心吾友郭子頻伽
少習倚聲長嫻詩教走馬礮碯塞上沽酒烏丸城邊回腸盪氣搖曳
情靈旣而端憂多暇雜以變徵蓋蓄隱而意愉實懷愁而慕思也頻
伽本吳產年來僑寓魏塘魏塘爲昔賢歌觴之地醋坊橋畔腸斷東
山水磨頭前情緣白石近乃取所爲蘅夢浮眉兩詞刊而行之余讀
之旣作而靳之曰東澤綺語家世番陽草窗笛譜淵源歷下鳩以翦
而語慧杏必嫁而實繁豈薄虹亭而心折小長蘆釣師耶頻伽笑而

不答遂書之以弁其端錢唐友弟陳鴻壽



懺餘綺語卷一

吳江郭慶祥伯箸

仁和許增邁孫刊

月華清

古銅一器如環背隆然有夔文雲臺中丞證以漢書外戚傳班固何晏賦定爲金釭屬賦此詞

根失倉琅關飛牡鑰漢宮遺事誰省幸舍椒塗猶賸辱金如餅看團團環轉無端見涎涎燕飛留影試問是落帶連錢此焉二等想得溫柔鄉近映月滿方諸日闕員蜃流落千年但有土花苔暈笑從渠禍水痕侵應不比銅山淚滲此恨只淒然通德背燈還認

疎影

黃葉邨圖

已秋未老正西風幾樹畫出斜照如此江南著箇扁舟看來煙水都

好漲痕初落籬根露添屋角數峯清峭想前邨定有人尋樹下小門
開了 自笑吾家同在半邨半郭裏歸計難料輸與谿翁三脚鐺邊
滿地霜華新掃馬塍西去秋盒冷只近日竹林遊少謂小松怕蕭蕭撼
撼淒淒點點暮雅寒早

柳梢青

惜花圖爲默齋作

斷送春光花開花落老卻潘郎白白朱朱紛紛點點惜惜悵悵 青
落生徧長廊是埋玉深深土香燕子歸時畫簾垂處一段斜陽

一枝花

默齋將有閩海之行以丁巳歲方君蘭坻所作西湖餞別
行看屬題歎逝傷離輒成此解

濕翠濃如許過了朝來涼雨野航三兩客舊漚鷺且緩驪歌小著尊
前句圖畫憑留取老去方干經營慘澹心苦 往事休重訴又早送

君南浦天涯端可惜酒人去天末閩山如薺圍榕樹橫海樓船渡問
手掣長鯨更憶釣魚師不

柳色黃

六扇窗紗斜掩微寒梅雨初過香篝潤逼紅綃笑覆畫衣文袴良宵
正永那信一殘春醪遙山漸澹眉痕妥若是不相憐肯佯佯偷臥
真箇入裏明月碧海青天半霄輕墮花影參差可恨烏龍閒鎖自來
小膽況經此度怔忡勝常道罷回身可道是不相憐又遙遙同坐

柳梢青

題斜倚熏籠坐到明仕女

皴玉誰溫熏籠倚徧難熨啼痕蠟鳳猶明檐鴉未起還算黃昏有
人會隔中門只許見朝來面勻簾柙垂時剪刀放了各自銷魂

齊天樂

查梅史琴媵軒屬賦

吳蠶愛作同功繭冰絲打來千縷軫玉分田徽金鑄礦久矣心心心
許二星在戶伴謝女檀郎最深深處百福香籩鱗鱗魚婢笑看汝
長卿可惜遊倦鷓鴣裘典了誰買詞賦錦瑟人長茂陵草綠暗老舊
時芳侶何時酒取怕鬢影春風天寒日暮一曲思歸悵悵深夜語

買陂塘

查丙塘補屋圖

笑年年塗泥束版寓公真似梁燕尋常不待秋風破已是三重茅卷
空谷晚儘帶荔披蘿楚客工幽怨阿稽阿段等刈稻歸來水筒修了
商略手初斷書生志廣廈胸中千萬漂搖先自難免妻孥不怪牀
牀漏頗怪屋梁仰面君不見有碌碡場邊苦草新如翦紙糊窗暖坐
曝背鄰翁驅雞稚子旭日照檐滿

南鄉子

夜永細聞香坐近金鑪鵲尾旁好是問人眠得未空牀白月微微印

一方 端的沒商量
臨去殷勤一盼郎
聽得中門雙扇闔
倉琅彼此 生生暗斷腸

又

嬌極卻愁他
未縮頰雲兩髻鴉
便問昨宵應酒渴
薑芽玉椀攜來雀舌茶
何計報伊家
說著先教粉淚斜
只願年年相對坐
窗紗君似菱花妾似花

點絳脣

詠小

叢桂山邊
那年早識愁滋味
羅衣心字憐
取橫陳未 一點脣朱兩點顰
眉翠紅兒比畫橋
第四添个人人你

鵲橋仙

詠五

梅花春早
雪花春好
色色迷離
都有問年剛是月團圓
想初二初三

時候 丁丁漏急鼕鼕鼓絕教擘藏鈎纖手移家船上肯同吾算只
少箇儂一口

南樓令

了烏鎖黃金交疏隱碧岑一重樓一段春心欲寄閒愁無著處人定
後月微陰 舊夢苦侵尋花枝瘦不禁傍闌干驚起栖禽燭影幢幢
鐙上了想又是疊重衾

滿庭芳

題沈秋卿夢綠庵

過雨霑沙流雲學水庭院又是微寒梧陰竹影深處著蕉團幾番去
怱怱花信換淒迷一曲闌干無人到香鑪茗盃欹枕睡初安 前賢
思北郭羈臣老去易雜悲歡夢江南萬綠見也都難年少東陽何事
卻尋常腰帶圍寬他時去圓莎分我吟就刻琅玕

綠意

娜嬛仙館蕉花畫卷

新涼雨足正乍回曉夢天影都綠半拓吟窗忽見低垂重重芳意如
蹙煮茶煙澹秋痕瘦鞦韆牆角一枝寒玉笑美人別逞妖妍小露紅情
猶俗 想爲著書人倦墨花斐几淨相伴幽獨史檠焚餘點筆圖成
仙掌露珠凝粟詩人愛寫蕭寒景恨未入雪中橫幅更待他鳳實成
時留配故園修竹

采桑子

碧紗窗外風吹雨密密疏疏似有如無薄醉消時燭暈初 醒來呼
婦閒商略載酒江湖息影菰蘆還作征夫作釣徒

探春慢

陳子玉鄧尉尋春詩意

烏榜衝烟魚鱗動鏡俊遊肯待春晚雨水才交雪花初霽人在虎山
橋畔吟到荒寒處卻早有翠禽啼徧笑他歌舫恁恁只向山塘塘半

記共阿連徐孺載畫榼癭瓢二宿猶戀風帽欹檐冰苔印屐似爾
少年清婉回首昔年夢已兩鬢吳霜輕點倘覓留題石樓應有詩版
醉太平

春花白紅春山澹濃春波才著春風疊春羅幾重 春晴意慵春陰
懊儂待他春月溶溶約春人載同

賣花聲

飲泉自畫芳草以寄望廬之思爲賦此調

一片好莓苔綠了空階蕨蕤深鎖舊池臺除卻斜陽和燕子還有誰
來 風納畫簾開獨自徘徊春痕如夢滿天涯泥上鞦韆泉下玉都
被伊埋

高陽臺

醉雲樓爲康山主人江文叔賦

十里珠簾二分明月仙人原好樓居別起閒房上頭青鳥飛初多情

合爲瓊漿醉早氤氳結就流蘇掩銅鋪萬綠陰中好箇青廬 鴛鴦
待闕先開社問何時西曲駕六萌車雜體江淹要伊小字親書外人
那識高唐賦見行雲紅上交疏笑狂奴他日重來平視容無

菩薩蠻

紅橋宴集代錢錢作

楊花薄處春雲厚紅橋微雨愁時候初試袂羅衣問人宜不宜 坐
中皆俊侶更喜能吳語千二百輕鸞何人沈下賢

釵頭鳳

鳳兒詞爲文叔作

丹山麓屏山曲桐花倒挂珍禽綠調琴等吹簫引初二下九月明風
定肯肯肯 香車促明珠斛何人墮此懷中玉文窗冷文園病一簾
秋雨滿階花影認認認

一枝花

嚴九能姬人張秋月故外家青衣也字以香修爲繪秋江
載月圖寄題其卷

月色兼秋色江上白蘋風急張星剛一箇月邊出除是君平還認支
機石應見天孫說僥倖梁清明河影裏迎接 相憶重相惜崇讓宅

中曾識問卿緣底事淚痕溼從此雙修儘安穩雙栖得心香憑更爇

沈水博山鑪看伊隨意縮結張愛誦唐人但見淚痕溼不知心恨誰之句

鳳皇臺上憶吹簫

題九能畫扇齋秋怨詞用漱玉韻原詞重一休字今易之

石闕碑銜金缸淚滿彈棊局在心頭把一襟幽恨寫上銀鈎已是今
生憐眷便他生未卜還休如何更星星記夢瑟瑟驚秋 香修幾生
到此書縫列芳名指印同留屬春人秋士好在紅樓夜夜牀前明月
爲故鄉溼了雙眸君多事人方欲愁卻又言愁

疏影

上元夜退庵招飲梅花下越日壽生自分湖來復會于此
用白石韻記之

玲瓏碎玉是舊時月色招我同宿隔歲相思第一回員休教便弄橫
竹微雲澹澹疎鐙小只解照枝南枝北儘夜深閒與徘徊不管倚樓
人獨佳約逾期肯踐夜潮放一舸來趁酒淥側帽吟寒也勝豪家
爛醉雲屏金屋江城試譜偷聲句怕略犯龜茲新曲算不如留影文
窗看取畫羅十平幅

探春慢

題汪芝亭桃花潭水圖

浪暖魚鱗霞蒸鴨脚川原遠近紅徧白舫猶閒青山如笑已有酒旗
風颭遙認前邨路問潭水近來深淺尋芳想未歸來文窗一半斜掩
難忘人生知己聽岸上蹋歌密意先感采石磯頭沈香亭畔何似
水邨山店商略從君住算我亦宮袍游倦新釀成時高歌爛醉誰管

霓裳中序第一

陳秋堂蕉林學書卷題詞

閒來補爾雅別院梧桐微雨灑剛是園林首夏正葦影天低蠟痕風
池香姜古瓦又麥光烏几鋪乍憑吟賞蛛絲拂徧蝸迹篆文寫窗
下水天閒話賸修竹數竿低亞人閒噩夢可怕看老去王維前生曾
畫鐵生金壺隨意瀉定一百碑磔比價還應笑冷抱殘編甚日殺青
也

雙雙燕

燕來笥 春晚客中憶故園風物得以下四闋

幾番潑火聽昨夜輕雷隔離先響參差迸土穿破碧苔如掌那忍堆
粲獨享正社籜乍開鄰釀少年最惜芳華淺醉烏衣深巷 比似春
蔥纖樣勝貓臥駢頭兒綳脫襪香泥愁洗上有芹芽新長苦憶園林
勝賞已稍拓當風窗網得知今歲櫻筵樓上人人無恙

附前調

曹言純種水

翠釵翦綵數風味園蔬盼來良久香泥壘戶乍是去年時候綉錦
紛紛卸就又誰識評量玉瘦除非比似尖尖社日停針織手春
酒治擊儘有羨鬪罷籬翁煮殘鄰叟山廚安配任斥油蔥菹韭愁
自櫻筵散後歎巢幕生涯依舊空並雉尾尊絲夢想故邨谿口

清波引

楊花銀魚

柳吹成絮渾未見綠萍礙艣昨宵涼雨波心櫂頭聚網定千絲否一
寸天然如許是誰憐錫芳名算白小應輸汝回潮枉渚記當日孤
艇小住不如歸去鶯脰作漁父菽乳香同煮篷背炊烟幾縷繫纜一
帶垂楊最惜惜處

附前調

黃安濤霽青

聽鳴榔徧依約在綠楊遠岸料應春晚連朝絮飄斷喜得漁童報

出網銀絲凌亂試來花港閒觀正唼唼白蘋滿
圓筋入饌比鱸
鱸風味不減水邨江店就船買尤賤調羹愛摻手一半晶鹽細糝
憶殺三月吳淞舵樓炊飯

夏初臨

麥人

吳鄉立夏以新麥微炙掌搓令熟謂之麥人以佐酒

白袷衫裁黃雲龍割麥秋將雨還晴立夏時光青梅白筍朱櫻登筵
莫訝猶生費曉寒玉手搓成年年風景鮑魚網出雉雉茸鳴 兒童

失喜翁媪開顏預知餅大合用羅輕冬前三白去年曾見瓊英顆顆
勻圓算除非瑟瑟盤盛念何時江湖得歸相就魚羹
元次山詩將歸就魚麥窮老江

湖邊

附前調

曹言純

雉雉初馴噎鳩早熟黃雲正捲春殘雪片勻搓影擡纖手闌干婦
姑還坐團團最憐他翠袖雕盤妝眉樓上秋風未來先作微寒

春來春去長定年時麴車夜夢麴市朝餐鄉思更切禽言婆餅林
端試整歸鞍怕飛蛾已上新紈待重看雙雙臂支只恐都寬

附前調

黃安濤

雉雉風前蛾飛雨後登場休過三辛病起春殘浮生又得嘗新漫
磨白雪紛紛看盤中粒粒珠傾廚孃捧出麴塵簸了伴取孤斟

書生結習辨種應難持竿空護說餅還能青衫潦倒尊前賦手誰
尋此日櫻筵合相招枕麴劉伶料吾徒黃羅帕封無分承恩費禕

賦東坡詩注今大內當麥熟時以黃羅帕封賜百官

惜紅衣

紫荷花草

菜甲黃攙麥畦翠剡半塍初繡紫艷紅天平鋪地衣厚芳名最好算
合襯蹋青鞵瘦知否陌上泥香乍清明時候 風前雨後一簇衣香
何人此攜酒春痕研妥想定坐來久記取往時沈醉守到夕陽紅皺

看牧童歸晚了角一雙簪又

雪獅兒

杭俗清明以粉餌作狗貯至立夏食之云可祛夏疫呼爲
清明狗月璘屬余詠之

搓酥滴粉誰把烏龍青黃偷塑寒食無烟搖尾知渠何處綵絲縛住
應不吠桃花月午怕待到石泉榆火論功烹汝 長夏困人良苦想
文園病久爲伊襖取上冢歸來黃胖泥孩同貯嬉遊伴侶小膽怯柳
邨花隴青春暮試問寄書能否

揚州慢

寄康山諸友

水木清華亭臺窈窕此中況著吟朋有雜花如錦有酒又如灑正吹
雪鱗魚上後藥闌紅處翠衷同憑屬嬉春新句醉中寫上吳綾 江
湖載酒料狀元此樂何曾也十面琵琶百番腰鼓換了滂膺說與史

半袁方子雲張子貞顧芝山想登臨憶我還能夢飛帆來也隔江山
色稜稜

琵琶仙

寄懷文叔

淺醉微吟句留處正是春光婪尾窗外時有春風來吹一池水況俊
侶風情未減看賓主才華齊綺側帽聽鶯回波撼蘆總在花底江
郎賦輕別念念對紅藥沈吟一年矣書記縱然無恙只離情難寄還
試問雲窗霧閣定有人薄擁雙髻更念宿雨晴時海桐開未

柳梢青

河東君小像

施粉施朱幅巾闊衷雅合稱儒

柳亦號儒士

白足逃禪黃綈入道老卻尙

書 百年彈指須臾更省識春風畫圖紅豆花殘紅羊劫小恨滿靡
蕪

摸魚子

汪蛟門先生少壯三好圖藏秦敦夫太史家太史屬題

是何人持椽踞坐圖書粉黛叢裏舍人才地鴻臚筆大有六朝風味
聊快意看當日羣公一一爭題字蕭郎差擬怕百尺梧桐而今愁換
繞屋白楊矣平生好何止區區三事可憐少壯能幾酒闌歌罷蛾
眉散老共蝨魚生死秦學士想山抹微雲此曲人能記二分月底且
屏當籤廚安排鐙杓容我坐中醉

西子妝

題壽生西湖訪秋詩冊

卵色浮青魚雲疊碧過了幾番涼雨柳痕烟態已疎疎記年年看秋
來處長隄延佇有多少驚傳漚侶讓吳儂買蜻蛉一個任風吹去
君休誤此段清遊天合教領取翬腰草綠馬蹄香是當時少年情緒
病懷漫與伴低唱淺斟應許屬尊前休賦悲秋秀句

水調歌頭

望湖樓

其上天如水其下水如天天容水色淥淨樓閣鏡中懸面面玲瓏窗戶更著疏疏簾子湖影澹于煙白雨忽吹散涼到白鷗邊 酌寒泉薦秋菊問坡仙問君何事一去七百有餘年又問瓊樓玉宇能否羽衣吹簫乘醉賦長篇一笑我狂矣且放總宜船

清平樂

酒醒人起竹影篩窗紙薄薄羅衾涼似水第一天涯滋味 柔魂不隔巖城唬妝見也分明欲續枕函殘夢奈他一陣鴉聲

浪淘沙

西陵晚歸

積雨淨谿沙魚尾明霞缺瓜小小趁風擗幾個畫船歸去也閒殺蘋花 烟靄半橫斜樹杪周遮酒旗樓角是誰家一面駝鉤都不下人

影涼些

國香慢

爲吳子修題顧橫波畫蘭扇面同壽生賦分眉生二字爲

韻

似畫修眉看不多幾筆葉葉離披秦淮煙輕粉澹自寫幽姿想見眼
波橫處便紅妝季布輸伊多情只紈扇辛苦流連露蕊風枝 傾城
惟一顧記當年雅謔仙也須迷同心句好白家蠻柳同時底事歛傾
落墨怕夕陽紅染胭脂還應足惆悵老去香嚴不與題詞

賣花聲

低髻約釵梁病不成妝唬痕已拭尙成行指點畫樓文杏好歸燕淒
涼 漸遠漸蒼茫燈火漁榔暮寒想透薄羅裳只得一鈎微月影多
少思量

續樂府補題五首

霜華腴

柏子

暮林黯澹映晚江離離一樹初圓紅脫楓衣白欺梅蕊十分綻了霜
天可憐翠鈿記當時樹下門前問何人曲唱西洲荻花蘆葉共清寒
隨意水邨山郭任漁娃打取雀豹爭喧曉色推篷斜陽倚櫂還驚
積雪留殘綺羅畫筵化光明一霎銅槃只愁伊易近風簾淚痕渾未
乾

秋霽

澹竹葉

荒徑尋秋有一種叢篁自弄寒碧个字低分鈿花涼戰寸寸嫩寒如
滴一枝一葉傍池漫帖玲瓏石更記得池外亂飛無數小黃蝶除
是雨過淨掃浮雲暮天蒼然如此顏色笑長條牽牛翠浥朝來先怕
日痕炙那似此君疎野格試覓籬畔正好藥錄收時藥籠攜采露華

尚溼

瑣窗寒

蠲蠲

絡緯啼殘涼秋已到豆棚瓜架聲聲慢訴似訴夜來寒乍挂筠籠晚
風一絲水天兒女同閒話算未應輸與金盆蟋蟀枕函清夜 窗罅

見低亞蔌幾葉瓜華露亭水榭胡盧樣小若個探懷堪訝笑蟲蟲自

解呼名物微不用添爾雅便蛇醫分與丹砂總露蟬同啞京師人以胡盧貯之

製極精好藏懷中飲以丹砂可養至十月

傾杯樂

沙裏狗

沙岸潮回水邨漁聚腥風幾日催發看伊瑣細何處斷港聽爬沙響

別酒人能說未應誤讀愁他彭越深梧試呷春酒暖雙眼一時波活

高陽舊游星散阿誰憑寄須糝吳糟壓定笑指尊前膽娘難擘也

無腸愁絕最憶松江鱸鮓雀一樣瓶泥坼

國香慢

煙草花

小朵娟娟簇微黃澹白點綴畦邊呼龍種來瑤草疑是藍田昔日遊
蠶稚蜨幾曾見如此芳妍無人解頻采薑稜芋陂一抹秋烟 相思
名字在算移根海島已幾多年花花縱好葉葉更動人憐無分湘筠
玉指倚熏鑪噓暖吹寒風前自開落陌上時時誤認花鈿

高陽臺

寒竹同陸祁生作

石罅苔黏池心冰膠此君尙倚高寒一片瀟湘凍雲留護琅玕三更
急霰才微響已枝枝壓近紅闌小檀欒花戶油窗密坐聽殘 回思
上番移栽後迸春雷幾處膩粉初乾燒筍年光忿忿又近椒槃蘆簾
紙閣朝暎暖惹檐前雀啅爭喧翦冰紈玉茗黃梅畫與君看

探春

次韻曹種水見贈卽題其擬古諸集

飛雪羣山翦江十幅天涯寒羽先倦萬貫纏輕二分月冷笑殺文章
錦片除是同心侶解說與多愁多感彈來促柱危弦是誰呼起箏雁
子建華年畹晚算甲子雌雄真合愁伴烏箭低篷蠟釭刻燭短棹
何時同返閒擬江淹體更試看柔豪頻染到及春前寒梅無數開亂

附原詞

曹言純

塵外誅茆病餘求艾文園初賦遊倦古道羊車曉裝駝褐還惹霜
華雪片方是殘年了怎忍得空江離感艣聲搖曳沙頭幾羣南去
飛雁 卻笑相逢未晚有折脚鐺邊叉手吟伴冰柱銷愁月橋乘
興莫似山陰輕返何遜風流筆待準擬官梅香染信入鐙花霏霏
春意凌亂

清平樂

繡鳳仕女

低鬟斜鞞淺研吳綾妥喚作針神應也可一口紅霞濃唾
秦樓煙月微茫當年有個蕭郎到底神仙堪羨等閒不繡鴛鴦

洞仙歌

曹種水水南邨舍圖

谿雲罨畫住人家三兩時見當門曬漁網聽漁歌唱罷有讀書聲臨
水處面面軒窗齊敞儂家魏塘屋水竹之閒占取茆堂一分廣支
港曲通船乘興能來儘緩打樵青雙槳奈一笑相逢各天涯總讓與
閒鷗作煙波長

祝英臺近

題孫華海惜花春起早卷子

繡簾垂瑤戶悄幽夢爲誰覺不裹頭巾幾徧曲闌繞趁他人柳猶眠
海棠未醒儘消受月殘風曉問啼鳥昨夜風雨何曾已有落紅了

莫是紅閨偷折數枝好試看香徑蒼苔露華濃處怕先印鞦韆羅痕小

菩薩蠻

顧升山畫蔬果十五種

東風欲破苔痕綠輕雷一夜驚蒼玉時節近櫻廚何人餉老夫 新

諳飡玉訣小點吳鹽白又是焙茶天山家處處烟筍

又

廢畦荒圃流泉泣一檐斜日鄰翁灌頓頓食花猪還須略配渠 五

湖煙水好可惜英雄老回首換年華春風雪白花蘿

又

當筵脫手金丸小蜂黃易著麻姑爪斜日洞庭帆也應喚橘官 重

來門巷改一樹垂垂在記得雪成團枝頭黃雀寒枇杷

又

清霜初點黃花瓦兔豪圓瓊檀雲藉香遠坐來微量沙淺護伊 形

容殊魁壘卻笑豐肌膩小盜載根株誰傳種樹書香蘇

又

一繩界破秋痕澹荒荒野蕩波流漫坐個小漁娃船身如缺瓜水
天閒話處隱語相爾汝要見玉玲瓏紅衣褪一重菱水紅

又

粉痕不掩梨雲凍金盤素手投來重薄汗拭輕容有人雙頰紅甜
香午枕透卯酒初醒後酒醒夢揚州揚州舊酒樓木瓜

又

蝸牛廬外連畦紫擔頭壓處喧朝市一笑謝廚孃飽嘗風露香當
時花滿地色與輕衫似轉眼又秋光悠揚小蜨黃茄

又

平生不負然糠火園收山棗同珍果隔岸有高荷秋來涼雨多岷
峨殊遠在那不陂塘買生計更疏蕪今年飯豆無芋

又

紅衣落盡星星見刺菱圓芡看都賤最好晚涼天賣時搖近船 西

湖秋老處唱徹雙鬢女莫道苦心多空房還奈何房蓮

又

森森鶴頂愁輕觸臂支起粟皴紅玉結夏記山房微風深隴涼 指

痕留一捻怕向鮫綃浥越女雪肌膚問郎曾見無楊梅

又

青房已拆珍珠罅金環臺榭吹初夏冰齒瓠犀寒芳名原帶酸 檀

郎閒調笑多子憐渠好低首入房櫳一方帶袂紅石榴

又

平疇子母迎朝日東陵別見新標格破處幾沈吟可憐碧玉名 水

天同夜話逆鼻香無價插竹看登筵星期又一年香瓜

又

紛紛誰見紅鹽墮春槃常伴蘋婆果吹氣本如蘭非關一蕊含
酒醒添病渴記取投時節纖核教還他夜鐙看作花橄欖

又

顛痕一抹紅霞暈吳孃小擘春纖嫩結子太怱怱關心昨夜風
瑤池開落後海底仙人瘦青雀倘飛還因緣見阿環桃子

又

短籬瘦竹欹斜挂一棚慣響疎疎雨低戰數枝花秋來絡緯家
萁湯煎太急飽嚼珠明月小坐晚風涼盲翁正作場扁豆

賣花聲

題思未酒醒聽詩小照

桐葉碧悒悒小院輕陰月痕澹照第三廳貪卷疎簾風露下不點秋
鐙樓閣對高稜招手還鷹夜涼乘興我來能酒半詩成慵不寫念
與君聽

又

題孫碧梧女士湘筠館樂府

小院碧雲停花又深深舊時珍伴共閒庭誰記迷藏花下事
蛟蜨蜻蜒 斑管費沈吟哀怨湘靈一弦一柱最惜惜彈盡明光三十段知
有誰聽

喝火令

許玉年有黃門之悼賦情悽戾自寫遺像屬題秀芬女士
一詞最工輒同其調

鶴舞吳門市鵲啼湖上墳小桃生命短三春腸斷蕭郎詩句三月十
三辰 墮馬鬟猶擁回鸞鏡易分殷勤留取卷中人且與題詞且與
爇香熏且與夜深人靜醜酒喚真真

懺餘綺語卷一

懺餘綺語卷二

吳江郭慶祥伯著

仁和許增邁孫刊

暗香

魂

玉妃喚月怕等閒忘卻前生瑤闕鶴背夜寒此際千山萬山雪誰覓
胡香四兩空留得香桃如骨試問與舊日孤山疎影一時活 嗚咽
古訣絕便碎翦紙花記得時節故鄉一髮江水茫茫恁飛越判使巫
咸不下央素女低徊潛說但只恐相見也黯然又別

疎影

夢

今生已矣又見來脈脈鐙背屏底道是相逢卻又無言惜惜自搵清
淚茫茫昧昧忽忽極尙病裏厭厭情味算向時怨緒歡情歷歷只還

如此 只是吳根越角一千二百里芳草無際澹月微茫萬瓦參差
那認荒荒園子真教不隔人天路也勝似一生顛顛說與伊休返蓬
山洞戶悄然雙閉

高陽臺

題樂元淑煙夢詞

荷露圓珠蘭風回雪空留名字堪憐才刻茗華不知玉已如煙方塘
無數田田葉問青泥何苦生蓮擘吟牋有客西江愁滿歸船 年來
同抱司勳感算傷春刻意不似今年芳草西陵爲誰澆酒花前人閒
只有三分月恨二分多照重泉又淒然一个流鶯相伴啼鵲

又

丙寅七夕

纖月藏鉤羅雲學水夜涼又是星期竹插瓜分當年一味嬌癡笑他
地久天長意換絲絲此恨無時又誰知天上人間薄命如斯 星沈

海底繩河遠話穿鍼心痛擘鈿眉低點點流螢飛來還坐人衣想應
低度紅牆過見妝樓網徧蛛絲可憐伊未卜他生不算相思

卜算子

微雨溼苔痕階下秋花滿有箇階前顛顛人病起和伊看 又是一
番秋只是無腸斷留得當年顛顛人也不恨天涯遠

臺城路

爲江子屏題蟬柳畫扇

世閒何限秋風客哀吟爾徧淒緊灞岸魂銷齊宮夢斷點入輕羅小
景纖纖瘦影照病葉殘枝抱來難定寂莫羈人平蕪千里故園冷
乘鸞秦女底處網蟲從徧了空認雙鬢蛻後仙衣妝餘寶鈿一例漂
零誰省啼雅露井只落葉聲中獨欹孤枕欲訴琴心暗塵埋廢軫

夜合花

見玉簪花有作

雨溼蒼英風彫荔佩感秋秋思頻添牆陰瞥見枝枝小玉排籤露痕
泫日痕遲只多情低照涼蟾更無人肯苔階溼徧來掐春纖尋常
粉印先霑付與冰蠶淺貯素手輕拈薄寒漸緊些時尙未開簾雲鬢
重蜜犀嫌記當時一味慊慊最難忘是通頭過了驀到前檐

摸魚子

樗園客感

任惜惜竹陰滿院苔痕長自疑雨回廊小徑無人到坐過一番闌暑
秋又暮便早有寒螿四壁催機杼羈懷何苦付破研深杯微吟淺醉
元髮變衰素江湖約負了銅駝俊侶蕪城枉說能賦文章信美功
名薄已誤昔年小杜休再誤問買取扁舟一棹歸何處滄洲紅樹認
小小柴門門前秋水幾箇舊溫鷺

浪淘沙

歸燕已差參何處疎碁天涯蕉萃旅人心開到芙蓉無限好只是秋

深推枕起沈吟小簟輕衾楓根可柰薄寒侵又是一宵檐外雨到
曉沈沈

點絳脣

病酒心情亂愁壓夢濃於酒曉雅聲驟一晌歡情勾枕上啼痕覺
後依然有還知否蚊幃如舊少箇拏幃手

高陽臺

水盼凝秋煙眉鎖恨披圖那不神傷水精簾卷犀梳猶帶餘香畫工
縱識春風面任調鉛寫出愁腸記年時錦瑟桃鬟都似伊長尋常
一晌閒言語到如今總費幾徧思量百就千攔自家暗減容光潮痕
兩頰生朝暈恨當初薄有疎狂祝秋墳休長蘼蕪怕上牛羊

金縷曲

席上贈阿許

燭暈華筵半怪琵琶抱來不正聲聲悽怨座上飛瓊傳姓字曾識舊

家仙眷量十斛珍珠偷換過眼穠華昏似夢
騰流鶯老去啼秋苑垂玉筍淚痕滿
天涯有客停杯歎算人閒古來多少桃笙團扇失路
才人孤憤客一例青衫淪賤只哀樂中年難遣試琢新詞能譜否怕
一聲裂帛鷓鴣弦斷將進酒莫辭勸

祝英臺近

髻堆鴉眉學字未滿十三四綽約春風先解折花戲不妨樓下迷藏
尊前捉搦總同在曲屏風底夜來起不知誰殺殘燈小膽破濃睡
嬌極鸚哥偏管隔簾事奈他澹月縈窗暗螢穿戶又悄地逗人懷裏

又

溯繩河遵枉渚別權理南浦挑盡蘭釭夜夜夜深語分明月魄沈輝
霜華催曉坐一對素娥青女送人去還要芳草長隄同印小蓮步
蹙繡香輿淚隔碧紗雨記否寶石山腰亭亭白塔是第一度分攜處

又

玉鞭迴鈿尺近幽蟲逼香潤作意生疏比似舊時省只憐已隔紅牆
牆東月上都不是那般花影 曉妝竟閒來還伴繙書喚坐喜邊肯
出匣冰圓認是內家鏡偷看荷背翩翩鴛鴦情顛倒又無語頰潮紅暈

又

楚妃愁湘女怨深巷舊巢換玳瑁梁閒海燕占來半生憎一片簾衣
不風不雨但鎮日周遮人面 有時見也只倦繡停鍼妝罷響金釧
多謝好風夜靜送刀翦如何葉葉花花相當相對只遣隔中門雙扇

又

鬱琴心寬帶眼薄病得伊感銀鹿青援那肯夜深伴難忘窗網將明
瓶笙猶響燈影裏翠眉微倦 五更短暗祝海水添他玉漏一宵緩
此後關心私語有時敢不防六幅仙裙留他未穩早已是皺痕都滿

又

玉壺迎金犢駕催赴紫鴛社瓊姊蘭姨遽別詎能捨料他月榭修眉

雪衾擁背全不記夢殘香燭 報歸也聽說多病文園玉骨不盈把
一笑憑肩青鳥信音假可應翦燭温存圍鑪暖熱且償我鄉來長夜

又

檢香篝攜畫燭衣潤怕梅溽初試生綃無力出新浴殷勤半瓊春醪
祝花長命渾不料霎時積玉 忍輕觸爲怕窗隙風尖容易颭羣幅
斜掩金鋪小犬吠花獨可憐從此心忪斷無人處誤幾徧拂簾蝙蝠

又

腕闌鬆眉黛結幽恨幾曾泄冰雪心腸肯怕隴鸚舌更煩小玉眠時
輕綃去後留一點闌人明月 太癡絕假饒長夜如年曉色慘將別
守定熏鑪坐到滿鑪雪尙憎阿母朝來梳頭喚起已亭角夕陽紅抹

又

月圓初鐙落後佳約敢輕負笑拂征衫春雪點衣厚儘教女伴猜疑
小眉秀靨都不似向時儻然 定來否人生如月華年一缺那能又

千徧沈吟三字莫須有請看束竹回腸香桃瘦骨換幾點裏邊紅豆

又

斷魂驚殘夢惡花事到紅藥中酒傷春比似去年弱無端半幅蒲帆
一聲杜宇又催去水邨山郭笑騎鶴明月原只三分都應照離索
小杜年來何忍更輕薄惟餘叩叩香囊藏來肘後待相見替伊親絡

又

雁飛遲人病早幾度促征棹誰料長卿石井掩秋草負他密字蠶眠
芝泥鴻印空望徧片帆煙杪鳩媒巧肯信不嫁娉婷已分十年了
何用錢刀刻意媚翁媪還虧百斛量珠一雙種玉也博得傾城微笑

又

遶香臺移鏡檻六扇小屏展研匣鍼箱分半貯來滿那時賣賦金多
壚頭價貴也未要鷓鴣頻典意深淺試將酒卜郎心寒宵倩伊暖
夜冷杯殘一霎近人散而今淒絕天涯醒然無寐便有酒也無人勸

又

倩風姨憐月上珠露記承掌認取前因此意料無恙驚心子夜歡聞
同聲婉轉已變了回波詞唱 漫惆悵人閒幾個尹邢蛾眉肯相讓
畫裏櫻桃愁裏小蠻樣尙憐鏡鵲同開釵蟲對剔還略似舊時情況

又

藥鑪煙相對裊深院晚風峭塵滿菱華一月幾曾照愁他鞦枕香雲
釵扶不起又何論遠山蛾掃 夢顛倒尋常銀液犀株不鎮暗魔燒

又

雛樣青衣所事被花惱關心嬌喘沈時暗眸迴處怕莫又喚江郎覺
掩啼珠扶瘦玉喚渡曲江曲縞袂纖褂腰細不勝束枉教疑作江妃
凌波解佩誰信有亂愁千斛 在空谷無柰日暮天寒零落去華屋
江鬼西陵夜雨杜鵑哭傷心逝水滔滔當時同渡卻雙槳歸來人獨

又

事三生魂一縷此錯幾州鑄肯放扁舟若箇勸無渡倘教玉在懷投
香和心爇萬一把遊仙留住 恁來去爲甚清映聲中都無片言語
尋到荒山風急又兼雨斷腸點點青苔方方黃土又埋了一家嬌女

又

短檠昏深院閉簾影黑垂地小擘吟箋暗記夢中事可憐放筆聲中
挑鐙影裏還認有箇人無睡 應難記縱饒記得星星有頭也無尾
自恨從前恩怨總輕視判將一寸絲腸一宵霜鬢報幾番去唾壺紅
淚

采桑子

尋常侍寢更衣處鐙影紗籠羅幕重重略近前時面發紅 月明雨
落無人覺侍婢都慵弄褶惺忪香棗何勞問石崇

卜算子

階下綠薔薇架上紅鸚鵡忘卻窺簾尙有人攜手潛來去 輕試踏

青鞵暗躡凌波步不道回頭別有人信口相儂汝

意難忘

箏語琴言約羊燈照影鳳紙傳牋天穿逢令節月滿記芳年人定後
夢來前難道玉如煙正峭寒春風催曉紅淚涓涓輕綃製就中單
認蠶黃蝶粉花落先黏鶻啼留恨血獺髓助香瘢金篋鎖鈿筐絨珍
重一春殘肯並他綠羅裙帶水上同湔

更漏子

杜蘭香羸弄玉一例仙家眷屬錦瑟短玉簫長何曾作髻忙月娥
熾花醋醋時節近來重五沈醉後錯相呼畫簾聞鷓鴣

洞仙歌

初二下七愛共蘭姨戲二八華年滿除四拜鍼神修笛譜步步教隨
婉婉甚也算齊心耦意揚蛾憎衆女謠詠紛紛池水干卿定何事
聯臂舊時歌變了歡聞重來後贏得大家顛顛若不是當年見猶憐

肯繡被分教伴鴛鴦睡

河傳

花顫鐙淺移來屈戍小屏深掩屏閒瀟瀟一雙栖東西兩頭蓮葉齊
麝熏未肯閒孤鳳梨雲凍好做同牀夢夢忽忽帳重重芙蓉深紅
和淺紅

沁園春

無分今生何似當初相逢漠然卻雛鶯乳燕見伊小日飛花落絮送
我中年玉淚珠啼紅愁綠慘便是無情亦可憐誰知是有心頭暗恨
記也難全 那回款語鐙前似密意深情略爲傳道枝名連理種原
無地禽名共命修到生天三素雲輕六銖衣薄定在寒簧瘦影邊還
能否撥齊煙九點來照孤眠

行香子

子貞月夜登小香雪亭作畫屬賦

孤榜清遊鳥帽籠頭問招來幾箇閒漚沿洄撥棹窈窕尋邱有三分
水二分月一分秋 平生最憶探梅踏雪虎山橋塔影香浮而今重
到怕減風流少舊時人舊時月舊時愁

霜天曉角

題吟香女子小影

綠萼開些拓當風畫紗窄地退紅衫薄恐小立冷於花 鴉又新挂
他問姍姍是邪說與吾家窗下有竹外一枝斜

湘月

題子屏填詞圖

石牀斐几正蕉陰綠暗雨過如沐漸入涼秋合料理舊日哀絲豪竹
鬢影琴邊箭修月底試與同聲讀江郎宮體譜來總是新曲 憶否
小住名園偷聲減字刻尊前紅燭協律微茫怕誤了多少詞流毫禿
滑笏牋長翻香令小薄有花閒福何時歸去記歌念取人獨

桂枝香

中秋有感

姮娥不嫁問終古淒涼可記長夜未必青天碧海便無情者一年十二回員闕恁今宵淚痕盈把那堪還又歌闌人散夢殘鐙燭想妝閣夜香燒罷看珠斗闌干檐角低挂有日雲鬟霧鬢照伊清話人閒小別何須恨恨沈沈青楓根下步虛聲斷霓裳曲破此生休也

玲瓏四犯

玉年以元人雁宿蘆花雅宿樹各分一半夕陽歸句爲圖極蕭寒清遠之致爲題此解

樹老易風蘆荒疑雪江邨物候初冷夕陽無限好又是黃昏近昏昏四山做暝但催他亂雅成陣更著蒼茫一行征雁嘹唳助淒緊天涯孤客閒省記菱根揆柁沙觜維艇小奴驚欲起點墨濃初定江湖有夢何曾熟算還是眠鷗差穩笑指檣頭船問載歸定肯

綺羅香

姑嫂餅

屑麵輕勻搓酥滑潤傳自香閨新製樣學桃花小印脂痕紅膩想曉
趁戛釜時光正嬌伴扶牀年紀全不防腸斷行人垂涎先在下風矣
橋梁臨水堪認道是蔣家妹小食單親試作罷羹湯纖手入廚重
洗笑曲讌畫地虛名愛齧脣頰椒風味莫教恁說與彭郎况甯王宅
裏

桂枝香

屠墳秋鳥

荒林落照認宰樹蒼茫一羣驚噪纖繳鳴弦已有弋人尋到陶邨馬
瞳披絲好算總輸酒邊風調蜀薑鳴釜吳鹽點雪樽瓶開了問何
事輕離海嶠有淥衣同戲紅椒堪飽萬里頭顱來博尊前人笑雲羅
滿地西風早想江湖羈雌多少料應夢斷蠻天一角暮煙孤島

雪獅兒

茗玉女士輯銜蟬錄隸事極博高邁庵爲作子母銜蟬圖
索題此解

粧樓記就知是無聊深沈院宇側鞦韆橫眠亭畔花陰剛午繡整小住
誰教見花奴戲舞更貌出薄荷酣後雙睛圓處 門外珊瑚鞭休去儘
香溫茶熟小名錄取箸裏青鹽差有殘書煩護癡兒駭女笑一例蟲
魚箋注應知否合伴畫檐鸚鵡

長亭怨慢

瞿花農分司相見西湖出王蓬心太守漢皋贈別圖見示
有二娛題詞輒依韻倚聲

笑又是閒雲離岫西子湖邊相逢梧酒漢上襟題回頭已是廿年舊
漫郎渾漫應未要稱聲叟對畫裏江山話昔日回颿風候 還試問
吳根越角可似武昌樊口扁舟容與且消遣雨儂風愆趁嬉春老鐵

能狂煩鑪畔諸公屯守指點傍西泠一帶青青新柳

柳色黃

於越中買新鵝一雙戲爲詠之

曇瓊邨邊春水方生短櫂初逼書生家具無多隨意一籠攜得滄波
亂眼送人千里歸來門前新柳嬌黃極還怕惱比鄰浴那家池側
無力鷗羣閒趁曬翅魚梁伴他鷓鴣老矣傭書不羨東堂行畝小樓
臨水難忘雙髻樓頭排成玉管參差立彷彿凭闌干見袖羅顏色

乳燕飛

送蔣淥初之臨川

一例天涯客怪相逢推襟送抱似曾相識西子湖頭長安道十載恍
同遊跡偏勞燕差池雙翼不信將軍門下見有此君蠻語余長揖同
握手章江側 齊年四十初過一看紛紛當時同學輕肥顏色雁鶩
行中紙尾署也勝白頭射策便詞列三王何益玉茗堂前煩問訊屬

海雲留取通仙笛曲有誤顧應得

水龍吟

江右旅館喜雨

疏疏幾陣涼颼颯然便送敲窗雨樹梢流響草頭顫影霎時無暑一片濃陰多應來自西山南浦料天公也厭炎官火繖怕困損人羈旅惜少高荷大芋展桃笙醉眠聽取紅綃初浴碧簪斜墜枕痕留午小扇輕衫知他此際倚闌何處向畫屏十幅瀟湘天遠夢尋伊去

浣溪紗

寄內

一別無端半載強輕船三版整歸裝可憐篷背已微霜月榭鎖魚鰾永夜風簾蠟鳳淚雙行不成還道不思量

疏影

燭淚

珠啼玉泣向畫筵深夜相對愁絕今世紅紅宿世蟲蟲生平最惜離
別風簾露席隨升降判滴滿爛銀荷葉算芳心未是灰時肯怕界殘
紅頰 便與籠紗護取也應護不到將她時節苦憶高樓網戶瞳矓
照見粉痕明滅羅襦低解聞薌澤有誰問堦前堆積只淒然擁髻人
人愁宛石榴裙褶

憶舊遊

酒帘

記絲楊漸暗文杏初明一見關心似與東風約看斜斜颭颭先得春
情隨意水邨山郭倦旅爲伊停正解佩人來提壺鳥喚好箇旗亭
阻風原不恨恨俊侶高陽多半漂零還向壚頭去認低窗高柳是處
曾經只是風前半幅不似舊時青試閒立平橋前谿煙雨深未深

聲聲慢

闌干

苔堦恨淺竹逕嫌深虧伊屈曲周遮背手微行湘痕紅出明霞沈吟
碧城十二問那邊庭院誰家閒付與瓊瓏澹月低亞疏花 嘗恨當
時夢裏枉等閒敲徧汲處尋他歸去恁恁斷腸一角天涯幾番畫廊
癡立認有人鞞裏來耶渾不見但文窗深掩絳紗

如此江山

香篆

何人斜掩屏山六簾衣又深深下小炷微紅輕絲漸裊靜看縈窗尋
罅尖風易惹恨剛結心同又吹烟炷一縷柔腸分明宛轉爲伊畫
湔裙水上猶記博山鑪俱過前約都謝羅帶輕分銀槃愁寄難翦夢
雲盈把熏籠倚罷對燈影離離悄無言者手撥餘灰隔窗梅雨灑

小樓連苑

簾波用蘭邨韻

後堂前閣空明最深深處溶溶地龜紋半蹙駝鉤不上一絲風細月

地雲搖苔堦潮轉欲垂還起怪驕猶睡醒雛鬟行到都驚道花枝碎
隔著樓頭廊底幾曾隔粉香脂膩只是陳王通辭難託湘雲湘水
便有時開見伊窳地畫看斜曳總生憐俊眼將流流不出相思字

風蝶令

和湘霞韻三首

煙視雙行近蘭情一見稀入懷嬌鳥向人依只覺愁多意重語言微
手裏題詩筆牀前織錦機蘇孃謝女是耶非難忘一燈明處兩眉
飛

又

漂泊年華小周防用意深鴛鴦翡翠定珍禽誰信單棲無侶到而今
湘影重簾認霞光斷臉尋兩頭帶帶盡同心知否一尊相屬意千

金

又

誓恐旁人聽情原我輩鍾別時莫恨太匆匆肯許名花移入別家紅
病定春來較人終月下逢祝他二十四番風取次送將帆葉五湖
東

買陂塘

十二月五日三衢道中

怪吳船看來葉小載人愁重如許阻風聽水年年慣不似者番淒楚
臨別語約消夏筵開定不過闌暑歸期屢誤又二九時光一千里客
未半到家路 閒情賦更惹新來怨緒故鄉鷺燕相遇遠山不作恁
恁別肯作鏡中眉嫵語更苦怕病蕊嬌花難待春風主亂帆無數誰
信有中閒烏篷一扇兩地夢來去

夜合花

燈花寄湘霞

善恨蟲孃含情蠻女多生半是啼痕相思一寸灰心又長情根玉釵

冷玉荷温囑雛鬟掩上重門只愁無睡對伊絮語銷盡癡魂 江湖
孤冷誰親多謝一尊酒淥相伴温存殷勤低祝並頭開出蘭蓀有何
事報伊聞道歸人已近家邨不知今後照他擁髻幾箇黄昏

一枝春

王清閣女史畫簪花仕女用草窗韻

一鏡春痕誰喚起多分敲窗微雨心期細數殘夢恨無頭緒幽蘭空
谷渾不省杏憨梅嫵但折來認取同心又惹兩眉愁聚 年時送人
行處記新梳叢鬢嬌歌金縷眉山漸遠十樣畫圖誰譜菱花側背料
怕有箇中人妒還怕有雛鳳釵頭聽人小語

醉太平

石敦夫曉風殘月行看子

曉山欲青曉煙未橫一帆早挂郵亭問何人曉行 蓉城曼卿屯田
柳生一生幾箇黄昏又今宵酒醒

疏影

惺泉浮香樓圖余舊爲作序并詩今相見於吳門正當梅
花時欲歸未得復爲倚聲作此不知有慨於中也

生香活色記舊會相約短棹遊歷認是西溪千樹梅花無人管領煙
月故家臺榭知何處有野鶴暫歸能說見當時二老風流閒倚畫欄
清絕 同向江湖流浪欲歸那便肯如此蹤跡江北江南銅井銅坑
過了試花時節人生但有二間屋便無地種梅也得問何時深閉柴
門臥穩故山風雪

買陂塘

爲莊栳堂題其尊甫遺照同二娛調

好煙波憑誰買斷魚陂千石萍泐四先生里家園在隨意卜居無恙
濠濮想便不載芴簪也號谿翁身綸竿一丈已付與兒郎釣鼈身手
老子任疏放 人間世齊物養生都妄騎鯨人又長往披圖不見南

華叟秋水拍天新漲添悵惘恨惠子來遲無與微言賞孫枝竟爽看
石上珊瑚掌中海月次第出絲網

瑣窗寒

寓齋窗閒見金絲花架一股知爲閨中物先是此閒彩雲
曾駐凝想芳澤雜以遐思邀楊浣薌同作

花落辭枝珠空騰匣是誰留取粉褪香銷轉更殢人淒楚想當時曉
涼妝罷小鬟纖手穿無數有紅絨替約素馨分配鏡臺斜覷人去
彩雲駐向花戶油窗拾來愁緒金絲幾縷也還勝同心釵股得知他
又側著髻兒明珠翠羽遊何處鎮無慆細撚閒吟背鐙深夜語

唐多令

卷簾仕女

鈿盒掩香奩金驅露玉纖想妝成初到前檐驀地回頭思舊夢渾不
似昨矜嚴 小院曉風尖羅衣卸又添記當時總恁慊慊留得小脣

和秀鑿判長隔一重簾

憶舊遊

題澣薌與鷗爲客圖用夢窗體

此生何所似似鳧雁啞啞水爲家江湖夢偏穩青山斷處一片圓沙
著箇風標公子海客肯來耶問如此陂塘定應相識莫又天涯 芙
蓉好湖水儘烏榜洄沿白袷欹斜欲逐鷓鴣去有雲羅萬里界住明
霞松陵舊盟寒未雙鬢已鬢髮且與醉西湖水仙廟外開蓼花

高陽臺

文孝坊偏百弓地小舊家容易遷流叢桂山邊淮南雞犬曾留營門
細柳如絲碧記攀條才拂人頭更移舟黃胖泥孩閒話春遊 前塵
如夢都難忘況驚殘楚雨想到秦樓去燕空梁此中無限春愁而今
零落知何處對孤山夜月香浮肯歸休一幅生綃環佩聞不

月華清

靈芬館前晚桂一株已樂未華夕露晨飈傾佇良久念將
遠遊恐不能待詞以催之

簾卷涼天葉明月地當時試花曾賦偃蹇淹留略與小山爲主數年
來幾度中秋已半付天涯羈旅容與待寒金粟綴嫩黃蜂注 爲底
銀屏深悄費似水尖風似珠涼露寂寞姮娥愁損葉兒眉嫵想夜來
碧海青天定見我舊叢延佇知否便能簪鬢髮鏡霜如許

洞仙歌

題高穎樓孫秀芬額粉庵聯吟卷

有情天上住一雙珍偶才膠冰絲玉琴奏看琉璃匣啓玳瑁簾開新
妝竟更費侍兒纖手 芙渠當霧夕得意何郎卻扇詩篇在人口並
坐擘蠻牋如鏡湘湖照夢裏筆花開又怕額上粉痕未曾乾早羅韞
花陰一詞先就

買陂塘

富陽道中見烏柏新霜青紅相閒山水暎發帆檣洄沿斷
岸野屋皆入圖繪竟日賞翫不足詞以寫之

繞清江一重一掩高低總入明鏡青要小試嬋娟手點得疏林妝靚
紅不定襯初日明霞斜日餘霞暎風帆煙艇儘悶拓窗櫺斜欹巾帽
相對醉顏冷 桐江道兩度沿緣能認者回剛及霜訊蕭閒鷗侶風
標鷺笑我鬢絲飄影風一陣怕落葉漫空埋卻尋幽徑歸來重省有
萬木號風千山積雪物候更淒緊

憶舊遊

嚴瀨道中偕壽生同坐船頭倚聲歌此幾欲令四山皆響
也

正風開帆葉雲擁山根又迸奔瀧合沓羣峯出似千屯冀馬高步臨
江江水彎環碧玉流影去淙淙算如此江山舊曾相識者箇吳艘
船牕喜同眺問畸士東京遺老南邦突兀高臺外賸紅衣一樹楓臥

空腔晞髮披裘都往斜日下漁缸但極目寒煙滄波白鳥飛一雙

菩薩蠻

鄰舟有見

衫痕翦取秋江碧袖羅紅繡雙鷓鴣山遠澹微茫蛾眉滿鏡長
爲誰同作客愁水愁風極野泊不勝寒錦衾斑復斑

行香子

安仁道中

灘緩波柔雲薄風收小春天客卸征裘斂舷一曲聽我吳謳正雁南
飛山北折水西流白鷺汀洲黃葉沙頭比江鄉一樣清幽他時歸
老若此何求只要山田要水碓要漁舟

洞仙歌

爲鼓園題女郎三喜小影

毘藍風緊墮諸天花蕊三界人天共懽喜正華年月滿薄命雲輕珠

一顆剛照弄珠樓底 東湖流不盡香艸相思有箇離騷舊苗裔佳
約踐難期一幅生綃倩留取畫蟬雙髻記桃葉儂曾渡頭逢要寄與
東風那時衣袂

月華清

題蘭邨倉山話月圖

水閣鐙殘地樓鈴語一丸涼月初滿幾箇秋人坐得六朝山澹只消
他隨分琴尊且話取露濃風軟三歎記昔年翬屐風流雲散 尙有
彭宣老去 蓉裳 指是處亭臺那時弦管重譜霓裳也恐羽移宮換料
素娥不解窺人定未識少年清婉歸晚怕故山猿鶴恁啼幽怨

賣花聲

莫愁湖秋泛圖

遠水淨員沙樓隱紅霞石城艇子小能擘閒向六朝山影裏去采蘋
花 衰柳幾絲斜風帽低遮舊時俊侶各天涯何似鬱金堂上燕長

傍盧家

紅情

蘭雪蓮花博士圖為淥春女史作

花為四壁看水雲砌就琉璃宮闕有箇玉人顏色與花略無別吹皺
平池萬淥教先向春波偷立笑隔浦卅六鴛鴦癡妒定愁絕 鄉國
去未決且小住橫塘並蒂雙折鷺漚伴侶半面頻闕也應得何似南
園老去認照影驚鴻都隔待樂府題補了聽伊摩笛

懺餘綺語卷二

邁孫先生靈襟浣月吟吻粲花握雲機之九張兼工衆制疊水調之
百闋最擅倚聲漱玉液于露葩紉蘭馨于秋佩冥契獨結靈芬是師
古佛之事鑄同黃金私淑之稱鑄之翠琬瑤杼所出瓊絲合奏矣海
桑閱變雲葉鮮遺先生慨焉乃發襲芸之藏重付雕梨之手合其三
種仍爲一編爰以校字得快先覩夫緣情造端導源樂府令慢代擅
厥義未亡洎近世之名流亦清辭之踵起然或銅琶鐵絳寄情于豪
宕融朱冶粉刻意于娥曼矜其一體終成單絃吳江扇徽郢歌應節
抗墜善變宛轉工思緝冰緒于衆家激霜亮于萬吹疑前身爲明月
是芬塗之導師墜響不振來學安式先生是舉不甚盛與抑又知先
生家富琅函性耽瓊祕凡 昭代諸家之詞或有舊編罕覲珍鏤已
灰莫不搜笛裏之清聲訂梅邊之小譜玉牋親寫綠笈深緘自茲以
往意且以次付刊將使棲塵秋瑟並調待絕之朱絃入手元珠彌煥
未沈之皓彩則是編之出爲嚆矢矣詒壽早嗜言情粗知按譜宗風

未昧願同一瓣之心香文章有神請以片言爲息壤光緒己卯十月
山陰王詒壽跋

麀餘詞卷一

吳江郭慶祥伯著

仁和許增邁孫刊

河傳

荼蘼

題碧梧女士
畫扇六首

春晚人倦起來遲額角輕黃退時二十平
四番風信吹絲絲枕函殘
夢知入骨甜香濃似酒簾卷後小試折枝手步池塘過回廊匆忙
鉤他宮裏長

清平樂

紫丁香

團香蹙繡一剪春風皺十索新詞渾未就贏得丁孃消瘦
芭蕉不展微陰含豪幾度沈吟付與閒愁百結不成沒箇同心

南鄉子

靈芬館詞

麀餘詞卷一

中華書局聚

茉莉

小玉雪肌膚道是珠孃道是吳一種卻教儂豔羨花奴得敏船舷見
彼姝綺夢半銷除長觸閒情尙爲渠記得夜涼人睡醒紗幮愛問
雲鬟墮也無

憶秦娥

秋海棠

秋如水露涼風細添顛顛添顛顛何曾得似那時濃睡一番薄病
扶初起爲伊立向空階裏空階裏亂蛩殘月冷清清地

洞仙歌

落梅

人閒無地著春愁千斛一夜東風與埋玉算玲瓏鎖骨葬向空山也
勝似蚤蚤安排金屋招魂來紙上斷粉零香猶是眉閒舊時綠莫
道不相思點點啼痕已漬滿輕綃十幅待夢到西泠去尋伊怕別院

樓頭又吹橫竹

浣溪沙

蘭花

髣髴銅餅見露苗
疏花嫩蕊澹含嬌
湘江清淚滴春潮
豈有心心同
婉孌并無葉葉助風標
斷腸一集是離騷

臺城路

和蔚堂題楊白花詩意卷子韻

不勝淒黯江南夢
濛濛慣隨春去水
驛波寒山亭風緊
身世有誰爲
主迷離如許
記曾向長隄那邊呼渡
一帶絲楊
湔裙不是舊時路
紗窗才拓幾扇
只捲簾人起
初見飛度燕子
關心伯勞偷眼
尙有流鶯相訴
東風辛苦問吹皺
池塘送伊何所打槳蘋洲
和儂漁篴譜

憶舊遊

滄嶼園故址

見蘆芽抽碧菜甲攙青柳綫搓黃路轉荒城角賸彎環漫水圍住陂
塘著意漣漣冶冶分綠上魚矸想盪漿船歸湔幫人去留下波光
中央儼孤嶼是平遠江山鷗鷺家鄉小立斜陽裏指斷霞明處昔日
紅牆塵世幾堪俛仰隨地有滄桑待菡萏花時還招野客乘晚涼

行香子

題小迂畫扇送老薑返揚州

蠶老柔柔鶯老垂楊又匆匆送盡春光送春送客同在他鄉乍月朧
朧雲澹澹雨浪浪 豆莢初嘗芍藥能香有人人正夢維揚勸伊小
住弭棹橫塘待櫻桃爛梅子熟枇杷黃

齊天樂

真州見杏花盛開

江南何處無煙雨先生者回歸未淮浦颿收揚州夢破墮入紅雲隊
裏烏篷搖曳早樸樹灣頭一旗酒貫卅里天桃愁春未醒尙濃睡

江湖載酒無端笑梅花開過猶自留滯今日重三明朝百五又見老
鳥銜紙樹猶如此銷燕燕鶯鶯幾番身世賣到樓前曉妝人定起

柳梢青

子貞招遊湖上題酒家壁

如畫春城乍寒暫暖似雨還晴梅萼將飛桃枝欲放柳色才青
良時令序難并算者度韶華有情昨夜初三今朝寒食來日清明

瑤華慢

小金山梅花欲殘香雪猶浮動山水閒

煙痕乍禁禊事初修尙薄寒時節雙槳掠波已喜得橋外水光先活
香南雪北騰一片冷雲明滅想妙高臺最高寒未有玉人橫笛
獨欹烏帽來尋認月觀風亭步步幽絕清遊較晚早滿磴落英如積斜
陽澹處又鉤起二分新月任隔牆梵放催歸未許翠禽啼歇

憶舊遊

過揚州未得尋樗園悵然作此

又煙花三月浩盪扁舟來問隋宮不待珠簾捲向管絃聲裏別去匆
匆記得舊巢痕在禪榻占春風有竹影便娟茗花妍媚桂樹丰茸
於中多好會歌邀子夜曲懊吳儂酒人兼狹客愛翻香令小減字
聲重一點綠毛么鳳容易傍梧桐問今度桃花何如昔日人面紅

夢橫塘

糧艘浣衣女郎婉頰可念感而賦之

文魚銜尾綵鷁排頭移來一痕波輕小小窗櫺正雨過筠簾齊捲越
紵裁前吳棉坼後停鍼人倦趁洗頭盆好蘸碧揆藍猶憐取餘香染
知伊住近橫塘有機中素織石上紗澣髻縮拋家便一任絮萍漂
轉算直北風埃撲鬢只恐羅衣暗中換弄暝天光柁樓晚飯想心情
都嬾

一翦梅

贈荻君

夾轂相逢問狹斜樓上琵琶門外枇杷風吹多少肯來耶臣里東家
吳苑西家澹澹藤蘿映月華好片圓沙好浣溪紗鴛鴦頭白記此
些不是楊花不是蘆花

貂裘換酒

題小農停杯顧曲圖

宛轉提壺喚泛觥船百分一棹花滿酒滿絲竹中年須陶寫隨分玉
簫金管有兩兩蟲蟲燕燕薄醉不消判茗芋已研羅帶畔春寒淺綽
板促急觴緩廿年前事韶華換又相逢甕邊捉臥依然酒伴後院
綺筵休著我杜牧狂言原慣早猜出護花人面嚼蕊吹香了無悞問
檀郎何事頻回看浮大白莫辭勸

買陂塘

雲臺先生寓京邸時有小園太常寺仙蝶嘗一再見之花

前舊藏董文敏詩箋有蝶夢之句因取以名園且繪爲圖而裝詩箋於前摹仙蝶於後屬賦

算王城萬人如海惟餘傲吏能隱阜城門內岡南畔尺五去天差近
花成陣仗廿四番風次第催芳信廊腰井吻有芍藥亭欹荼蘼架重
容易落紅槿容臺叟便面銀鈎猶印墨痕如此芳潤漆園有道義
皇上那屑六朝金粉頻問訊識此客人閒不羨朱衣引圖書經進好
平地歸來小園賦罷黑蝶繞雙鬢

高陽臺

病酒

似夢還醒將眠又起今朝直恁無聊未展屏山帳紋時動冰綃數聲
啼鳥驚人覺已懨懨紅日花梢喚茶甌眼倦微搓舌強須澆天涯
沒个閒消遣況故人重見俊侶都招雪白花紅那禁物色相撩元龍
豪氣隨年減算而今祇讀離騷計行程私祝江風莫阻歸橈

鵲橋仙

留別荻君

鷗侶同波秋心比潔野水荒灣愁別多應石上有前期又墮我一丸
蘿月 莫是潯陽夜來送客醉貌略如楓葉天寒日暮定相思判畫
到爐灰成雪

水調歌頭

曼生屬題其大父魯齋先生釣鼈圖

陳登湖海士李白地行仙置身只合蓬島九點渺齊煙截得孤生之
竹綴以一丸明月引手六鼈連最好不貪寶閒任老龍眠 螭均立
熊軾畫賦歸田騎鯨一笑天上披髮去翩然今日繫舟山下尙有讀
書孫子小割試烹鮮待爾政成後同放五湖船

買陂塘

題種水圖用原韻

笑村農何會學稼釣徒或者堪擬隨身但有閒漁具那用鶴頭鴉嘴
如此水便都變良田盡種長腰米也能餘幾要秋釀春醪糧分瘦鶴
花插百弓地 揚州夢中酒阻風聊爾灌夫曾畜爲弟君與余齊封
侯老矣知無分亭長新銜魚計浮世事恨漁父湘纍不得同時醉掃
除家累約一舸相從五湖許泛分取畫中意

原作

曹言純

宅清漳中央南北前賢軌躅難擬由拳城外誰爲伴鷗鷺招來沙
觜畊白水拚羹飽蒹絲香飯炊菰米田園賸幾笑兩槳緣流一篙
蹋浪那有卓錫地 形容賴無分登瀛畫爾家風漁父兄弟魚陂
千石封侯等也乏計然心計身外事算儘付蓑衣獨速船頭醉閒
情自累只笠澤編書蕢洲譜遂未了舊時意

風蝶令

題伯生香嬰室圖

館是童初築山仍羣玉居神仙何事最關渠聞說三千玉女盡知書
傳得嬋娟影憑將樓閣圖新宮一記待儂無還要蠶眠細字倩麻
姑

菩薩蠻

題雙紅豆圖

東風在手靈苗活南園紅豆春來發接葉更交枝一雙兩小時長
真高閣好閣裏人難老記曲喚紅紅芳名也愛重

買陂塘

題改七香少年聽雨圖

最銷魂蕭蕭暮雨吳娘舊曲曾聽畫船櫂轉花兜外六扇窗紗紅近
眠未肯任窳地香羅垂下流蘇等九枝鐙檠照人影幢幢屏風曲曲
容易卸妝竟歡場好只倚少年豪橫花前醉倒休醒星星一點來
頭上便與歌樓無分君也省要招此無家同住清涼境香鐙清磬儘

蝙蝠拂簾芭蕉繞屋欹枕睡來穩時有破山寺
結夏之約

滿庭芳

題呂卿香齋館圖

蘿帶飄煙荔裳寒雨高館儘好吟秋楚詞課罷容易畔牢愁是處疏
簾不捲盪瀟湘一片雲浮閒行徧芷畦蕙圃隨意小勾留 前修思
屈宋美人香草寄託深幽便微詞多有也足風流好在桐花萬里肯
同他顛顛江頭只憐我王孫游倦歸思滿芳洲

水龍吟

題曼生石門聽瀑圖

青天何處龍吟濛濛吹出漫空雪松濤萬壑冰絲千縷琴心三疊洞
口雲荒山中鶴老何來此客想謝公去後石門深鎖留好景與誰說
海上歸來時節儘雍容閒尋風月簫笳聲斷箏琶耳洗一時清絕
木葉羣飛四山皆響蒼然寒色認跳珠濺玉銀河垂處有仙人謫

聲聲慢

和慈仲坐雨之作

蓬蓬尙遠淅淅將闌
懜懜不辨朝昏
汝南雞好虧他
猶記蕭晨硯池
一泓殘墨爲昨宵
留住愁痕
還題句要裁雲
剪月逗一分春
差喜歸來相對正
鐙花粲粲
杯竹傳根才卸
征衫又煩洗卻
征塵微吟淺醉
休輕視勝他時
遠道懷人判醉也
便取次書徧練裙

買陂塘

稼庭以藕香來歸繪圖紀事余題種藕成蓮四字於首頁并系以詞

買陂塘
玻璃十頃請看綠淨
難唾東西南北
皆蓮葉除是江南才可
開一朵認妙法華鬘
不受青泥
宛移根帖妥儘由檻低
憑畫欄閒倚
月曉未愁墮
臺城路聞說莫愁曾過
沈吟佳約能果
鷺猜鷗妒更番事
直得銷魂真箇浮一舸也
勝似秦淮漆板紅船
播修眉休鎖笑

桡花波迴鴛鴦夢穩雙調唱還和

齊天樂

單藹臣司馬夢回圖用穀人祭酒韻

儘銷一枕遊仙意繩牀木榻堪埽栩栩回初惺惺斷後只有靈光孤
照綠天遮了任雨覆雲翻不將公惱影事前塵黑甜鄉裏最幽悄
人閒世事都幻付漁篷滄浪睡起成笑石鼎茶香瓦鐺飯熟誤卻浮
生多少醒來也好奈白日黃雞一齊催曉我亦揚州十年留賸稿

買陂塘

題琴隲邪溪漁隱第二圖用飲泉韻

記年時青鞵布鞵沿緣尋徧煙水樵青打槳漁童唱驚得浣紗人起
重到未悔如此溪山不把扁舟繫住爲佳耳看劍外官人湖邊老監
鄉夢畫圖裏男兒事出處要非無意再二想見高寄三千六百璜
溪釣何似一竿風細儂試擬怕比似鴟夸太早五湖計鱸魚雖美又

驛吏催人街亭排馬風雪促征騎

賣花聲

題李子木煙泉蘿壁看子

青玉削嵯峨秋影羅羅坐來寒翠溼衣多領取風泉歸一壑彈入雲
和卜築傍岩阿老子婆娑郎君撰杖侍行窩肯信有人空谷裏日
暮牽蘿

臺城路

宣窰蟋蟀盆

秋風吹換人閒世此中貯秋聲者似鏡能圓比甌無缺還勝香姜殘
瓦提攜羅帕慣阿監青蛾聽來長夜別盡苔痕棘鍼花草極妍雅

一行小款誰寫怕銅仙漢苑鉛淚如瀉金鼎香熏錦堂詞麗都付冷

攤評價

宣德銅槃多刻錦堂春詞

千金注也笑蟲達侯封論功此亞譜入唐風水

天兒女話

綺羅香

同人集文藪山房酒閒為柳東題朱竹翁瑞蓮詞冊即用

竹翁第一首韻

別院燈紅照檐梅白夜酌正開春甕閒話詞仙杯底酒波如涌新聲

倚羅綺香餘遺墨在文章緣重應笑他頭白曹侯買來一水也思種

種水有和作

菱池槐汧都廢那有紅衣翠蓋水風涼送遂譜費洲吹醒

老漁殘夢積厝外臥柳將青斷約下員紋欲動問何時更櫂蓮舟藕

絲同雪孔

如此江山

西齋七十二賢峯草堂圖用琴隲韻

十年蹋徧西湖路西谿獨遲搜討晚港尋煙秋華帶雪可許蘆中人

到山阿窈窕似羅列成行曲眉齊掃者箇茆堂分明指點出林表

余懷天際渺渺風塵都倦矣陳跡還蹈兩鬢先絲一椽未卜慚媿白

鷗吾導眼中了了只東野詩工有山難抱篴譜蘋洲聽歌應絕倒

浪淘沙

己丑除夕閱種水削縷詞中有和周晉仙明日新年一閱
輒和其韻未免見獵之喜也

驄馬鐵連錢芳艸芊眠載來金鴈與鈿蟬
筍柱十三釵十二一櫂舳舫
舊夢阿誰邊說甚因緣只今禪榻坐蕭然
佛火爐香清到曉明日新年

壬午十二月廿二日所假館之樓火僅跳而免所著皆燼友朋
掇拾閒以鈔寄不復次第得卽存之頻伽記

爨餘詞卷一